

ნიკოლოზ კიკელაძე

მეზობელი



გამომცემლობა „საბჭოთა საქართველო“
თბილისი — ქუთაისი, 1977

ნიკოლოზ კოპალიანი

და თუ საკვდილი ფრონტზე მომელის,
შეერდნატყვიარი ვაჟაცად მსახეთ,
დარჩები შენ და შენი ნომერი
შეირჩენს ჩემი გმირობის სახელს, —
ამ ბილეთს ფლობდა კაცი, რომელიც
საზღვარს ვაჟაცურ მოკლული ნახეს.

ეს სტრიქონები ამოღებულია ლექსიდან „ჩემს კომკავშირულ ბილეთს“, რომელიც ჟურნალ „ჩვენი თაობის“ 1938 წლის მე-12 ნომერში გამოქვეყნდა. ორნახევარი წლის შემდეგ დიდი სამამულო ომი დაიწყო, ხოლო ომის მესამე წლის დასასრულს, როცა ფაშისტურ გერმანიაზე გამარჯვების ზეიმი უკვე მოახლოებული იყო, ამ ლექსის ავტორი, ახალგაზრდა პოეტი, კომუნისტი ნიკოლოზ კოპალიანი, — თითქოს აღნიშნული სტრიქონები ახდო, — პატრიოტის სიკვდილით დაეცა სამშობლოს მტრებთან ბრძოლაში, საბჭოთა ხალხის თავისუფლებისა და ბედნიერი ცხოვრების სადარაჯოზე.

მას რომ სიცოცხლე დასცლოდა, დიდ სამამულო ომში გამარჯვების ჩვენს უკიდევანო ზეიმს რომ მოსწრებოდა, მისი ბიოგრაფია ასე მოკლე არ დარჩებოდა.

ნიკოლოზ (კოლია) დავითის ძე კოპალიანი დაიბადა 1915 წელს ცაგერში. აქვე სწავლობდა ჯერ არასრულ სამუშაო სკოლაში, შემდეგ პედაგოგიურ ტექნიკუმში. ბეჯითი მოსწავლე იყო. „ზარმაცი წიგნზე თავს დადებს, ბეჯითი კი — თვალბისო“, — უყვარდა აქმა და წიგნებში ხედავდა გატაცებას, ცხოვრების აზრს. განურჩევლად ბრწყინვალედ ფლობდა ყველა საგანს. რა ამოცანა უნდა ყოფილიყო მათემატიკურ საგნებში, ის რომ ვერ გამოიყვანდა. მშობლიურ ენასა და ლიტერატურაში ხომ ბადალი არ ჰყავდა მთელ სკოლაში. როგორც აკადემიურად წარჩინებული და აქტიური პიონერი, 1929 წელს სახეიმოდ მიიღეს ლენინურ კომკავშირში. მას შემდეგ განუწყვეტლივ იმყოფებოდა პიონერულ და კომკავშირულ სამუშაოზე. მისი ენერგიული, ინიციატივიანი შრომა, რომელიც ყველას ანცვიფრებდა, არაერთხელ აღნიშნულა პიონერმუშაკთა თათბირებზე, კომკავშირის რაიონული კომიტეტის პლენუმებზე, კომკავშირულ კონფერენციებზე, რესპუბლიკურ პრესაში იყო თავმდაბალი, მორიდებული, თავაზიანი, მოსიყვარულე, მხიარული. თითქოს

იშვიათობას წარმოადგენსო, ყველაფერს საოცარი ცოდნით და მიმზიდველობით ფლობდა: სამხატვრო საქმესაც, სპორტსაც, მუსიკასაც... არა თუ ჩანებულად მღეროდა, არამედ თვითონაც თხზავდა ბავშვებისათვის სიმღერებს საკუთარი ტექსტებით. განსაკუთრებით უყვარდა ფანდური. ლექსების წერა კი 13-14 წლისამ დაიწყო. ლექსებს, აგრეთვე პიონერული და კომკავშირული ცხოვრების ამსახველ წერილებს, თავდაპირველად კედლის გაზეთებსა და ხელნაწერ ჟურნალებში აქვეყნებდა. შემდეგ კი გაზეთ „ნორჩ ლენინელში“, ჟურნალ „პიონერში“, რესპუბლიკურ რადიო-გადაცემებში, უფრო გვიან წლებში — რაიონულ გაზეთში, გაზეთ „ახალგაზრდა კომუნისტში“, თავისი მსუსხავი სტრიქონებითა და კარიკატურებით აქტიურად თანამშრომლობდა სატირულ ჟურნალ „ნიანგში“ ფსევდონიმით „ნ. რახი“.

1934 წელს ფრიადი შეფასებით დაამთავრა ცაგერის პედ-ტექნიკუმი. გული თბილისისაკენ, სახელმწიფო უნივერსიტეტისაკენ მიუწევდა, მაგრამ დედა ვერ მიატოვა: ერთი წლით, სანამ უმცროსი ძმა ტექნიკუმს დაამთავრებდა, გადაადო ამ წადილის ასრულება. რაიონის ხელმძღვანელებმა იგი სათავეში ჩაუყენეს საბავშვო სახლს, სადაც თავი გამოიჩინა, როგორც ამ დაწესებულების მოწინავე ხელმძღვანელმა, ბავშვების საუკეთესო აღმზრდელმა.

1935 წლის ზაფხული. ნიკოლოზ კოპალიანმა წარმატებით ჩააბარა გამოცდები თბილისის სახელმწიფო უნივერსიტეტში. ფილოლოგიურ ფაკულტეტზე ჩარიცხეს. სტუდენტობის პერიოდში იგი უახლოვდება დედაქალაქის ლიტერატურულ საზოგადოებრიობას, უფრო სწორადაა მწერალთა კავშირში, ახალგაზრდა მწერლების სექციაში, ჟურნალ-გაზეთების რედაქციებში. გარდა „ახალგაზრდა კომუნისტისა“ და „ნორჩი ლენინელისა“, ლექსებს აქვეყნებს საქართველოს საბჭოთა მწერლების კავშირის ყოველთვიურ ჟურნალ „ჩვენს თაობასა“ და გაზეთ „კომუნისტში“. მიმოიხილავდა რა ჟურნალ „ჩვენი თაობის“ 1937 წლის მეხუთე-მეექვსე ნომერს, გაზეთი „ლიტერატურული საქართველო“ თავის იმავე წლის 10 სექტემბრის ნომერში (შალვა აფხაიძის წერილი) აღნიშნავდა: „ლექსებიდან თავისი ემოციურობით და მხატვრული შესრულებით უნდა გამოიყოს სევ. ისიანის „მყინვარის გოდება...“ ან. თევზაძის „შენი სახელი“, აბ. მახარაძის „ილია ჭავჭავაძეს“, ნიკ. კოპალიანის — „წიწამურთან“ და გრ. ცხვედიანის — „ილიას“. ან კიდევ: „საბჭოთა საქართველოში... პარტიის ხელმძღვანელობით მრავლად აღიზარდნენ ახალგაზრდა მწერლები, რომელთაც თვალსაჩინო ადგილი უჭირავთ მხატვრული სიტყვის შემოქმედთა მოწინავე რიგებში. ასეთი ახალგაზრდა მწერლები გვყვანან ახლაც. ესენი თავს იყრიან უმთავრესად ჟურნალ „ჩვენი თაობის“ ირგვლივ. ამთგან, გა-

მოქვეყნებული ლექსების მიხედვით, ყურადღებას იპყრობენ მაყვალა მრეელიშვილი, ნინო ქობულაშვილი, გ. კალანდაძე, ვ. უბილაძე, იოსელიანი, ანდ. თევზაძე, ვ. ლომიძე, შ. ამისულაშვილი, გრ. ცხედიანი, რ. მარგიანი, ნ. კობალიანი, ი. მენთეშაშვილი, ქუთელია და სხვები. მათ ლექსებში მოჩანს პოეტური ძალა. ავტორები ამჟღავნებენ მოვლენათა მხატვრული გააზრების დამახასიათებელი დეტალების განჭვრეტის, ტიპური სახეებისა და შედარებების მონახვის უნარს". (ერ. ქარელიშვილი — „ლიტერატურული ახალგაზრდობა და „ჩენი თაობა“. იხ. გაზეთი „ლიტერატურული საქართველო“, 1937 წლის 20 დეკემბერი).

ბეჯით სწავლასა და ნაყოფიერ შემოქმედებით მუშაობაში განვლო სტუდენტობის ხუთმა წელმა. 1940 წელს ნიკოლოზ კობალიანი წარმატებით ამთავრებს სახელმწიფო უნივერსიტეტს. მას წინადადებას აძლევენ დარჩეს ასპირანტურაში, რისი ზურვილიც თვითონაც ძალიან კქონდა. მაგრამ ოჯახური მდგომარეობის გამო (უმცროსი ძმა სავალდებულო სამხედრო სამსახურში გაიწვიეს) იგი მიემგზავრება ცაგერში, დედასთან. აქ მას საშუალო სკოლის ქართული ენისა და ლიტერატურის მასწავლებლად ნიშნავენ. მთელი არსებით ჩაება პედაგოგიურ მოღვაწეობაში, საზოგადოებრივ მუშაობაში. არ შეუწყვეტია ადგილობრივ და რესპუბლიკურ პრესაში თანამშრომლობა.

ასე გაგრძელდა მხოლოდ ერთ წელიწადს, 1941 წლის 22 ივნისამდე...

დიდი სამამულო ომი რომ დაიწყო, ნიკოლოზ კობალიანს უნებლიეთ გაახსენდა კომკავშირული ბილეთისადმი, სამშობლოსადმი მიცემული ფიცი — სტრიქონები თავისი ადრინდელი ლექსიდან: „თუ მტრად მოსული ვინმე დავეხლე, დავცემ, ეიდრე ზღვარს გადმოლახავდეს, თავს ვისახელებ, შენც გასახელებ“. გული არ დაუდვა: მისი უმცროსი ძმა ოთარი ხომ ომის დაწყებისთანავე ჩაება ვერაგულად შემოჭრილ მტერთან ბრძოლაში. მალე ნიკოლოზ კობალიანიც ჩადგა მეთმართა რიგებში. მან აქ საბრძოლო იარაღი დაიმშობილა, რათა ღირსეული წელილი შეეტანა მტრის განადგურების საქმეში. მაგრამ კალამს მაინც ვერ შეელია, იგი სიცოცხლესავეით უყვარდა — უყვარდა პოეზია, ხელოვნება... ლექსების, დღიურების წერას ბრძოლის ველზეც განაგრძობდა, ეს ჩანს ფრონტიდან გამოგზავნილი მისი პირადი წერილებიდან, რომლებსაც დაინტერესებული მკითხველი ამ წიგნის მეორე განყოფილებაში გაეცნობა, გაეცნობა და არ შეიძლება სინანული არ იგრძნოს მათი ავტორის დაღუპვის გამო.

ნიკოლოზ კობალიანი ფრონტზე გაემგზავრა იმ რწმენით, რომ საყვარელი სამშობლო მალე დააღწევდა თავს ძნელ განსაცდელს, გერმანელი ფაშისტი დამპყრობლები განადგურებული იქნებოდ-

ნენ და გამარჯვება საბჭოთა ხალხს დარჩებოდა. ეს რწმენა მას თან სდევდა ბრძოლაში ჩაბმის დღიდან უკანასკნელ ამოსუნთქვამდე. იგი ოცნებობდა გამარჯვების დღეზე, ოცნებობდა და თავისიანებს დაუინებით თხოვდა, დედას არაფერი მოსვლოდა ამ დღისა და შვილების მოლოდინში.

1944 წელი.

დიდი სამამულო ომის მესამე გაზაფხული იდგა. ფრონტზე ყოფნის მესამე გაზაფხული იყო იგი ნიკოლოზ კოპალიანის-თვისაც.

6 აპრილს მან თავის უფროს დას ნინო კოპალიანს და სიპეს დიდიმ მარგიანს ღია ბარათი გამოუგზავნა თბილისში. „შეტევის წინ, სანგარი“ — წარწერილია ბარათზე. იქ მხოლოდ რამდენიმე სტრიქონი იყო: „ჩემო სანატრელებო! ახლოვდება მძიმე დღეების ბოლო და რარიგ სანატრელი ხართ ჩემი კარგი თბილისითურთ!.. დამიკოცნეთ ანზორი და ნელი, მიუსალმეთ თქვენს კეთილთ, მეგობართ, იყავით მხნედ და კარგად!“

ერთი დღის შემდეგ კი, შვიდ აპრილს, 29 წლის ნიკოლოზ კოპალიანი გმირული სიკვდილით დაეცა პუშკორსკის ველზე (ფსკოვის ოლქი). მას არ დასცალდა ეზეიმა გამარჯვება, უშუალოდ განეცადა საკუთარი სისხლით მოპოვებული თავისუფლების სიხარული, სიხარული თავისი ხალხისა, რომელიც გულში ზათუთად ინახავს სამშობლოს მგზნებარე პატრიოტის, მამაცი ჯარისკაცისა და გულწრფელი მომღერლის ნიკოლოზ კოპალიანის წმინდა სახელს.

* * *

ნიკოლოზ კოპალიანი ჩემი ბავშვობის მეგობარი იყო.

სამამულო ომის დამთავრების შემდეგ დემობილიზაციით რომ დავბრუნდი, მისი ლექსების, სხვა ნაწერების შეგროვებისა და გამოსაცემად მომზადების დიდი სურვილი აღმემჩნა...

ეს მიზანი, როგორც ხედავთ, პატივცემულო მკითხველო, უკვე განხორციელდა; აღსრულდა პოეტის ღრმად მოხუცებული დედის ნატვრა: რა კარგი იქნებოდა, კოლიას ლექსების წიგნს საფლავამდე მიეცილებინე — ისე ჩავთვლიდი, თითქოს ორივე დაღუპული შვილი ცოცხალი მყავს და სადარდებელიც აღარაფერი მიმეყვებო.

ამასთან დაკავშირებით მინდა ნიკოლოზ კოპალიანის ახლობლებისა და მეგობრების სახელით გულითად მადლობა გადავუხადო საქართველოს მწერალთა კავშირის ქუთაისის განყოფილებისა და გამომცემლობა „საბჭოთა საქართველოს“ ხელმძღვანელებს, რომლებმაც გულთან ახლოს მიიტანეს ფრონტზე დაღუპული პოეტის ნიკოლოზ კოპალიანის ლექსების წიგნის გამოცემის ესოდენ კეთილშობილური საქმე.

0 9 6 6 0 0 0

მურის ციხე

რა კარგი ხარ, ქარაფებზე
გადმომდგარო მურის ციხე!
ნუთუ შენი ფიქრებია,
თეთრ ნისლებს რომ შუბლზე იხევე?
ლოდმაგარო, კლდმაგარო,
სიყვარულით ანაშენო.
ამ ხეობის, ამ მიწაწყლის
სიტურფეე და დამამშვენო.
შენს გარშემო მიჯარულა
მთა-ხეეები ასერილი,
თითქო ბასრი ხანჯლის წვერით
დაჭრილი და დასერილი.
შენს ხეობას გულს უღადრავს
მოჩუხჩუხე ცხენისწყალი,
მყინვარების ღვიძლი შვილი
და მქუხარედ მიმავალი.
ფრიალო კლდეს თავქვე ჩასდევს
ვებერთელა „ღვეის ხერელი“.
პირღია და უცნაური,
გულში შიშის შემომგვრელი,
ხევით მთაა წამომდგარი.
იქვე გორა — ლაწუნდარის,
ცაში შუბად შეტყორცნილი
და ნისლების საბუდარი.
ამბობენ, რომ იმ შენს ხევში.
როცა მტერი ჩაიკეტა
და ჩვენს გმირებს გაუჭირდათ
ყიზილბაშთა ამოწყვეტა —

შენს კოშკიდან თურმე ხევში
გაღუყრიათ ბლომად კირი.
შემდეგ მომხდურთ ჩასვებიან
ვაჟაკური დაძახილით.
და ყველანი აუკუწავთ,
თვალდამწვარი, შენაბური.
და მას აქეთ ამ ხეობას
დარქმევია თურმე მური.

1935 წ.

...და დარჩა ხსოვნა

ინგ. აკ. გოგიძეს

ლეჩხუმის მთებში ჩაწოლილი პირ-
ქუში ღამეც მოუთხრობს მხარეს
ამბავს კაკო მონადირეზე.

...და დარჩა ხსოვნა...
ცხრათვალა მზეს როგორ ვიჭერდიო,
ახლა სხეული მიეხრწნება
სამარის ფიცარს...
და თუ საფლავთან მეწვევიან
გოგო-ბიჭები,
სხვა არა მინდა, ჩემს დარჩენილ
სიცოცხლეს ვფიცავ!
მაგრამ მე ერთი მომაკედავი
მაინც ვინატრი...
რაა სადარდო, სხვა ვინ რჩება
ამ ქვეყნად ნეტავ!
ყველა მანდ მოვალთ, — ასეთია
სიცოცხლის ბოლო...
ჩვენც დაგეწევით — ნაბიჯებით

გაგეისწარ მხოლოდ...
...შენი ზაფლავი... მასთან ბევრი
ღამე ვათიეთ...
ქვა რომ ქვა არის, ქვაც უცრემლოდ
როგორ ჩაუელის...
დღეს ავატირეთ დედაშენი,
და გვაპატიე
დედის წინაშე ჩენი დიდი
დანაშაული...

• • •

აქნებ ვცდები, რომ მოგმართე ამით შე,
ან ამაოდ იქნებ შენკენ მოველტვი...
ჩემო კარგო, არ განრისხდე. დამითმე, —
სიყვარულმა ასე იცის ყოველთვის.

ღამეა და თითქოს ჩემ წინ თენდება,
შენზე ფიქრმა გული დანით დასერა,
ჰა, მიიღე აზრის შემოქმედება,
სიჭაბუკემ რაც ამ ხელით დაწერა.

არ მეგონა შენზე თუ იმღერებდა
ეს გული და ჩემი განცდა უღევი.
არ მიიღო გამხმარ ჩალის ღერებად
ჩემი ყრმოების ეგ თქმა ნამარხულევი.

ხშირად, კარგო, სიხარულიც მრგებია, —
როცა ჩემკენ შენი ღიმილი მოვა;
მაგ თვალები ჩემი ფიქრის გემია,
ფიქრები კი — მღელვარ ტალღების გროვა.

1935 წ.
ლაილაში.

გაიგები ერთი ლექსიდან

....ირხევა ფიჭვის, ნაძვის ხეები
და გრილი სიოს ტალღა მოგორავს.
ჩემი სიცოცხლის ტკბილი ღღეები
ხომ შენთან დამრჩა, კარგო გოგონავ!

როგორ მეგონა ამ გულს დაჭრიდი,
ან მიიღებდი ფერისცვალებით...
ახლა მარტოდ ვარ ტყეში გაჭრილი,
აქაც მაწვალებს შენი თვალები.

მე სიხარული ყველგან მაქებდა,
ახლა კი რა ვარ, — გამხადე ლეში...
ან არ დამედგა ფეხი მაქეთ და
ან არ მენახე ჩემს სიცოცხლეში...

1935 წ. აგვისტო,
ბორჯომი.

ნ ე ტ ა ვ

ახლა აქა ვარ, დაგტოვე. გოგო,
წამომყვა შენი სხეულის ჩრდილი,
შენი თვალებით ნაისრი გული,
ნეტავ იცოდე. მაოცებ როგორ,
როცა ჩემს გულში ესოდენ ზრდილი-
ცდილობ დააჭვნო ტრფობა დარგული..

მალლიდან ფიფქი მოდის პეპლებად..
მარტყია ნისლი და ხშირი თოვა, —
მეც გადამრიოს სიჩუმემ ლამის...
ნეტავი ვგრძნობდე, თუ იფერფლება.
ჩემგან შენდამი მოძღვნილი ტრფობა,
ანდა ვინ არის მიზეზი ამის?

...მე კი ისეთი დამრჩა განცდები
მანდ გატარებულ ტკბილ ღღეებიდან,
რომ შენც ფიქრობდი ჩემზე, მეგონა.
და როცა, ალბათ, დაუვაჟკაცდები.
თავს გამოვიყვან გაკვირვებიდან, —
რატომ ვეძებდი შენში მეგობარს.

...თითქოს მაროობენ თოვლის ფაფქები
და მომითხრობენ ზეცის ხეაწიადს, —
ნეტავ გაზაფხულს ჩამოძიყვანდნენ...
მხრებზე მაწენან შენზე ფიქრები. —
ხომ არ მოახვევ გულს შავ არმიას.
თუმც ჯერ ვერც კი ეგრძნობ, რომ არ გიყვარდი.

1936 წ.

ცავერა.

მზად ვართ მუდამ...

ღვინუმში, მურის ხეობაში დღემდე შემონახუ-
ლა სამი ისტორიული ციხე-კოშკი: „ჰკა-მაგას“,
„მაგრად დახედი“ და „არ გაუშეა“. ისინი მტრის-
გან კარშეუჯალნი იცნენ.

მურის კლდეთა ქარაფებზე
სამი ციხე გადმომდგარა.
ო, რამდენი ხეაწიადი
იმათ ჩვენთვის დაუფარავთ.

ციხეები „მაგრად დახედი“.
„ჰკა მაგას“ და „არ გაუშეა“,
რისხვა იყო მომხდურთათვის,
გულს უკლავდა მტერს და ღუშმანს.

თუ ძველ ხილთან მტრის შეტევით
შედრკებოდა მტრის სანგარი,

ციხე-კოშკი „მაგრად დახედი“
მტერს ხედებოდა გულმაგარი.

მაგრამ როცა რკინის ალყა
მებრძოლ ციხეს გათანგავდა,
„ჰკა მაგასო“ — დაძახილი
მოძმე კოშკის მთებსაც ძრავდა.

თუ ამ ციხე-გალავნებთან
ველარ ძლევენ მომხდურს გულშავს,
მეზობელი ციხე-კოშკი
დასძახებდა — „არ გაუშვა“.

„არ გაუშვა მტერი უნდო“ —
მთაც იძახდა გულაღზნებით,
და გაქცეულ მტერს მიჰყეფდნენ
ციხე-კოშკის ზარბაზნები.

ციხე ციხეს გვერდში ედგა,
როგორც კაცი შენაფიცი,
იყვნენ მტრისგან შეუვალნი,
ღუღაბივით შენამტკიცნი...

ღღეს კი ჩემი გმირი ხალხი,
გამარჯვებით ბედნიერი,
დიდ ბელადის ნაამაგარს
და მშვიდობას რომ უმღერის,

ასე ამბობს: ღე, ესმოდეს
ყველა მომხდურს, მტერს და ღუშმანს:
მზად ვართ მუდამ, მტერს რომ დავკრათ,
მაგრად დავხედეთ, არ გაუშვათ!

1937 წ.
ცაგერი

საახალწლო წერილი დედას

გახსოვს? „წასვლა და ნუღარც მოსვლაო“
ეტყოდი ძველ წელს ბაგერხეული;
იყავი ამ დღეს ლხენით მმოსაეი,
თუმც ჩანდი სევდით გულჩახვეული —
ზამთრის ავდრიან საღამოსავით.

დაგვირიგებდი დილით ტკბილეულს:
— დამიბერდითო, შვილებო, ასე...
გაიზარდენით, ღაწვებშილეულს,
რომ მეც მარგუნოთ დღე ლხენით სავსე.

მალე შენც მიხედი, რა ცრუ ყოფილა
გაწვდილი ხელით ცისკენ ვედრება;
ოქტომბრის დღემდე არ გაყოფილან
ჩვენი კერა და ბედის ყვედრება.

ახლა ტკბილია ახალი წელი,
ნაძვის ხეც შუქით ანთებულია,
მოაქვს ცხოვრებას ოქროს ფურცელი,
რადგან პარტია ჩვენი გულია.

მან ქვეყანაზე სიკეთე დარგო,
დარგო ხალხების ძმური დანდობა.
დედავ, შენ ტკბილი სიბერე გარგო,
მე კი — ღამაზი ახალგაზრდობა.

1937 წ.

წ ი წ ა მ უ რ თ ა ნ

მეხის ქუხილი რომ შემოგესმა.
ქართლზე ფიქრობდი მაშინ იქნებ და...
რას იაზრებდი, ვინმე ოდესმე

შენს. სასიკვდილოდ ხელს გაიქნევდა,
ტყვია მოგარტყეს, შეგაწყვეტიწეს
ჩუმი ბაასი მაღალ ფიქრებთან.

თვალცრემლიანი დატოვე ვაჟა,
აკაკიც დარჩა ობოლ სანთურად,
ატირებულან, მშობლიურ ლაყვარდს
რომ მოგაშორეს მუხანათურად.
მიწაში ჩაფლეს შენი სახელიც,
დღეს რომ აღმდგარა და გამართულა.

შემოიდრებლავს გულს წიწამური
და მოგონება თვალეხს დანამავს;
ქვეყნის ვარამის მხრებით ამტანო,
დიდება სისხლში ვინ აბანავა,—
ბრალია დღენი ლოდქვეშ ატაროს
ხალხის მესიტყვემ შენისთანამა.

გიგონებთ გმირს და დიდებულ მგოსანს,
გზაზე დაცემულს ვერაგის ხელით;
ნეტავ დაგცლოდა ჩვენამდე მოსვლა,
შენი სამშობლოს გენახა მხსნელი,
რა სიყვარულის დაფნებით გმოსავს
დღეს საქართველო თვალგანახელი.

1937 წ.

გახსოვს ის ღამე?

— არა, „მშვიდობით“, — არ გეტყვი, გოგო,
ისევ გნახავ და ისევ ნახვამდე...
ვნატრობ ჩემს სახელს — შენსას მე როგორც—
სამარადჟამოდ შეინახავდე...

გახსოვს ის ღამე? გული გაცივდა,
შენზე ფიქრები მაინც გარს პერტყმის,
როცა მზე ისევ ცხრათვალობს ციდან,
შენ რად მარგუნე გული ნასეტყვი.
დაედუმებულვარ, ვის რა შეეჩივლო,
ან ეის რა ეუთხრა, ან ეინ რას მეტყვის.

1937 წ. სექტემბერი,
ცაგერი.

დილა ბანაკად

გადაიხსნა ცამ მანდილი,
ცას მზიური ღიმი შეენის,
ან არა მქნა, ან ამ დილით
შემახვედრა სახე შენი.

შენი სახე შემახვედრა.
გულს რომ ათბობს მზეზე უფრო,
გითხრა — ნეტავ მომცა ხვედრად,
რომ მე ერთი დაგეუფლო.

მალლა არ ჩანს ღრუბლის ბინდი,
ცა კრიალებს და დღე დარობს.
გაკრიალდეს, ამ სიწმინდით
შენ მაინც ვერ დაგედაროს!

1937 წ.

აკჰადა

ასრულებულა მისი წადილი

ვაჟა-ფშაველას ხსოვნას

ისე გაშორდა ღამაჲ სამშობლოს,
მის ზმელეთს ყვავილ-ნარგიზებიანს,
არ ღირსებია ცრემლის დაშრობა,
ტკბილი სიმღერა არ ღირსებია.

ენატრებოდა კრიალა ზეცა.
პირზე ეარსკვლაეებგადაფანტული.
დასტრიალებდა სამშობლოს ბედსა
მისი ომახი ზმა და ფანდური.

თმებს უბარდნიდა მთების ნიავეი,
ქართული ღამე ესხა ნაბადად.
ჩარგალის მიწამ გულმადლიანმა
ხალხის მომღერლად იგი დაბადა.

შებინდებისას მგოსანი მისებრ.
იწყებდა ზეცის თალების ზვერვას.
სამშობლოს ცაზე მოწოლილ ნისლებს
აფრთხოვდა მისი ცალთვალა მზერა.

ერთზე ფიქრობდა გარეთ და შინაც
მშობელი მხარის ბედის მისანი.
აყოვლებო, — იტყოდა ხშირად, —
ყოილნი ჩემნი ივერისანი!..

ასრულებულა მისი წადილი —
წინ გვაქვს ქვეყანა, ბაღს რომ ედრება.
რბიან და რბიან წელიწადები —
ახალ სიხარულს რომ გვახვედრებენ.

ეს სიხარული პოეტსაც იწვევს —
ვერ დაივიწყოს იგი ვეროდეს!..
ბრალია — ვაჟა საფულაეში იწვევს,
ბრალია — ახლა ის ვერ მღეროდეს!..

შეზინდებისას მგონის საშლავთან

დღე რომ კალენდარს ფურცელს შეახვეს,
მთაწმინდაზე რომ მოვა დაისი,
ნიავე ჩანგის სიმებს შეარხვეს
და მიმზიდველი ხმები გაისმის.

უხმობს აკაკის — გნახო მინდო,
რომ გააგონოს, ზმას არ იშურებს,
ტკბილი ჰანგები ფარავს მიდამოს,
მთაწმინდის სიო აშარიშურებს...

უხმობენ — ჩვენთან რად არა ხარო —
სიოს რხევა და მღერა ჩონგურის,
უხმობენ — ახლა რომ გაახარონ
მუდამ მწუხარე და გათანგული.

...სადღაც თვალს ახელს მწვანე რტოებთან
მთვარე—ლაჟვარდის მანდილოსანი...
ჩანგი ეძახის...
საფლავს ტოვებს და
მალლა ამოდის ლანდი მგოსანის.

ჭაღარა ისევ თეთრად ღაღანებს —
კავკასიონი ახლად ნათოვი,
თვალები ისევ ბნელეთს დაღავენ —
ჩაუქრობელი ორი მნათობის.

გახედა მხარეს, ეძებს საწინდარს,
რომ მოაგონოს მისი ცხოვრება.

იცნო მთვარე და იცნო მთაწმინდაც,
თბილისი მაინც ეუცხოება.

თითქმის ზმელეთზე აღარ ეტევა,
გაზომა თვალით სივრცე ქალაქის, —
რამ დააყარა მარგალიტებად
ზეცის სიუხვე ასე ბარაქით!

რამ გაუბრწყინა ვარსკვლავთ ამალა,
ხალხს ვინ დაუშრო ცრემლის გუბენი.
ხელი ვინ გაჰკრა ზეცის კამარას,
ვინ მოაშორა შავი ღრუბელი?

ვინ აუყვავა მგოსნის ქვეყანას
მთები, ველები, ხევი, ფშიარა...
პასუხად თბილის-ქალაქის თავზე
ოქტომბრის დროშამ შეიშრილა.

1938 წ.

მთაწმინდა.

ამბავი ერთი სადღეგრძელოსი

(ხასანის მსხვერპლის ხსოვნას)

ყური დამიგდეთ, ხალხის ძენო და
ქვა-ხე-ბუჩქებო ამ რბილ მდელოსი.
ვთქვა სუფრის მორიგ სადღეგრძელოსთან
ამბავიც ერთი სადღეგრძელოსი.

იყო ვაჟკაცი — ხალხმა გაზარდა
მიწის ვეფხეად და ზეცის არწივად,
ჩვენ აქ ვლზინობდით, როცა ხასანთან
მან სამშობლოსთვის თავი გასწირა.

ედგა გუშაგად რკინის მხარბეჭით
ქვეყნის სიხარულს, დღეებს დარიანს,
ყანწის მაგიერად დროშა ეჭირა
და ღვინოდ მტრების სისხლი დალია.

თავის სიცოცხლით მან სადღეგრძელო
უთხრა ქვეყანას, მშობელ მთა-გორებს.
მისი საფლავი არსად ეძებოთ,
იგი ჩვენთან დგას, ბრძოლებს გვაგონებს.

იგი ჩვენთან დგას. გაშლილ მკლავებით
გვიყვება სწორებს ხასანის ამბავს.
ყურს უგდებს ზეცაც და ვარსკვლავებით
გმირის ნაამბობს ლაჟვარდზე სტამბავს.

აგი ჩვენთან დგას, დიდების ღირსი,
სუფრის ღირსეულ ადგილს მფლობელობს.
ჯერ სადღეგრძელო დავლიოთ მისი,
შემდეგ დაგვიღევს სამადლობელოს.

დედა ფრონტზეა, კატარავ!

(ესპანელი ბავშვისადმი)

ტყვიის ზათქი გაგაღვიძებს,
ეძებ ირგვლივ დედის თვალებს;
ვერ პოულობ და სახეზე
გადაგივლის სიფერმკრთალე.
იგი ფრონტის მებრძოლია,
დაიძინე, მოვა მალე!

შენს ტოლებს და შენ სხვა გივლის
დედასავით ტკბილი, ნაზი.
შენ რა იცი, დედაშენი
სახლში შენთან რატომ არ ზის,

შენ რა იცი, შენი მშობლის
იბარურთან წასვლის აზრი.

ყვავ-ყორანი ქვეყნის ზღუდეს
დაღაველებს, ფრთებს იკეცავს;
გულში ავი ზრახვა უდევს,
თვალებიდან ცეცხლი კვესავს,
განუზრახავს დააბნელოს
ესპანეთის ლურჯი ზეცა.

ვნატრობ — იყო ისე დიდი,
რომ ბრძოლაში მამებს სცვლიდე,
ფრონტზე გასულ მშობელივით
ქვეყნის ვარამს განიცდიდე,
ნეტავ გრძნობდე, რომ ასეთ დროს
სახლში არც შენ მოიცდიდი!..

... მუქ ღრუბლებში სძინავს მთვარეს,
შენ იძინე ისევ მშვიდად...
დილით, როცა ცისფერ თვალებს
გახსნი, მოვა დედა შინ და
გამარჯვებას მოგილოცავს
შენ საჩუქრად ქარიშხლიდან!

1938 წ. მარტი

ჩემს კომკავშირულ ბილეთს

გამოგვივლია წლები ამდენი,
ერთად გავიარტ კიდეც წინ სავალს,
ერთად დაგვათოვს დღეთა ფანტელი.
რითაც გამიცან, ისევ ისა ვარ,
შენც ისევ ის ხარ, ის ჟრუანტელი,
როცა მიგიღე ხუთმეტწლისამა!

შევხარით მშობელ ხმელეთს, ლაჟვარდებს
და სიფხიზლეზე მანთებ, მამხნევებ,
ჩემს უკანასკნელ გარიჟრაჟამდე
თუ მტრად მოსული ვინმე დაეხელე. —
დავცემ, ვიდრე ზღვარს გადმოლახავდეს,
თავს ვისახელებ, შენც გასახელებ!

და თუ სიკედილი ფრონტზე მომელის,
მკერდნატყვიარი ვაჟკაცად მსახეთ,
დარჩები შენ და შენი ნომერი
შეირჩენს ჩემი გმირობის სახელს,—
ამ ბილეთს ფლობდა კაცი, რომელიც
საზღვარს ვაჟკაცურ მოკლული ნახეს.

დარჩები შენ და, შენი ჭირიმე.
ეს სიხარული ჭაბუკს მაწვიე.
ხალხს უთხარ, როგორ შემინაწიო
ქვეყნისთვის ყრმობა და სიყმაწვილე,
მისთვის ვაჟობა და სიყმაწვილე.
გმირობა როგორ გავინაწილეთ!

1938 წ. დეკემბერი.

ბელადის სურათთან

ნათელი ოდის კედლიდან
ასე თბილად რომ მიღიმი,
ნეტავ აქ იყო, გასმინა
ლეჩხუმელ ბიჭის ღიღინი!

შენზე ვიმღერებ. რადგანაც
მალლა შენი ცა მახურავს,
ჩემი ბავშვობის ზამთარმა
შენი მზით გაიზაფხულა.

რამდენს აჩუქე მზის სხივი,
ქვეყნად ცხოვრება სალხენი,
ვინ მოთვლის ქვეყნად რამდენმა
ადიდა შენი სახელი.

გეტრფიან ჭაღაროსნები,
ვისი სიცოცხლეს გიხსნია,
გმირული ახალგაზრდობა
შენი მოდგმა და სისხლია.

ხალხის გული ხარ, ხალხი კი
შენი ფარი და ხმალია,
შენი ზრუნვით და ალერსით
დღეს ყველას გაუხარია.

იხარე, ვერვინ დაგძლიოს...
მტრის ხელი თუ აიქნევა,
ეს გულიც შენს დასაცავად
მილიონ გულთან იქნება.

ჭაბუკი მტკიცედ დავხვდები
ტყვიას ტყვიაზე მიჭრილსა,
შენთვის წავიდეს სიცოცხლე
ერთი ლეჩხუმელ ბიჭისა!

1938 წ.

ა კ რ ო ს ტ ი ხ ი

აქაც არიან შენი ხნისანი,
სინაზეც კი აქვთ, თუმც ფერწასული,
მაგრამ მათ შორის მე ვერ ვიცანი
ამ გულის ტოლი ერთი ასული.
თუ გსურს იცხოვრო, კარგი ის არის —
იყოს მარადი ჩვენი წარსული.

1938 წ.
თბილისი.

ცხოვრება, თურმე, არ ბინახია

(მოხუცი სვანი — რევოლუციამდე დაღუპულ შვილს)

დამბადებოდი ოქტომბრის შემდეგ,
გენახა ღლუთა სიტყბო. ალერსი.
ბიჭო! წავიდა დრო, როცა გლეჯდნენ.
როცა მიენდე ხანჯალს ალესილს...
რა იქნებოდა გეცოცხლა ღლემდე!

კერას მზიანი ღლეები უღვას.
მზე არის გარეთ, მზე არის შინაც.
შენ კი სიზმრებში გიცქერი მუდამ,
ისე აყვავდა სიცოცხლე, შვილო,
რომ გულს მარადჟამს სიცოცხლე უნდა.

ხარობს ქვეყანა, შენ რომ დატოვე, —
გამხარებელის გულმა იხაროს!
სიცოცხლეს შენებრ როდის დარღობენ, —
ნეტავ განახა, რომ შენი მხარის
ვაჟები ცაში დანავარდობენ!

შევხედავ ბიჭებს, ხნით შენოდენებს,
(მომაგონდები მაშინ მეტადრე),
რომ იმშვენებენ მკერდზე ორდენებს.
მათ გვერდით. შვილო, შენც მომენატრე.
ნეტავ გხედავდე ჩემკენ მორბენალს!

ნეტავ გელოდე ჭაბუკს მაღლიდან,
მოტორს მართავდე გულგატაცებით.
ჰაერში ფრენა შენც ვერ დაგლლიდა,
ქვეყნის საზღვრებთან ივაჟკაცებდი,
მტერს შეზარავდი ზეცის თალიდან.

სადღაა ის დრო, მზეს რომ გილეედა,
შენზე რომ მარგო ცრემლი და ოხვრა.

გეოცხლა — ახლა იყვავილებდა
შენი ბავშვობა მკერდნაოხარი,
რადგან ქვეყანა ღზენის ბაღია.

დარდი ცხოვრების ტრფობამ დახია,
სასიხარულოდ ზალხი აშლილა,
გულში უღევი ძალა მარხია...
ამდენი გზარდე და მაინც, შეილო,
თურმე ცხოვრება არ გინახია!

1939 წ.

მაინც ერთად ვართ...

გახსოვს ღენხუმი, მთა, ცხენისწყალი,—
რომ გვიზიდავდა გიჟმაჟ პატარებს?
ქალაქს წამოსულს წყალმა — სისწრაფე,
მთებმა — სიმკვრივე გამოგატანეს.

მოსულხარ... სოფლის ცელქი ბიჭისგან
წამოგყვა ტრფობა გაუმხელელი, —
რამდენჯერ ხეზე ამომიჭრია
შენი სახელი ბავშვურ ხელებით.

შემდეგ დავშორდით... წლები გასულან,
დღეს გაოცებას გული ვერც იტევს —
შენ გისწავლია ფრენა, ასულო,
მე კი ვამთავრებ უნივერსიტეტს.

ზეციდან უმღერ მშობელ მთა-გორებს —
„მე შენი ვარ და შენ ჩემი ხარო“,
იმღერე მუდამ, — კვლავ გამაგონე,
აგრემც ქვეყანას შერჩები, ქალო!

კელავ დამანახე ზეცის ლოყაზე
გიშრის ხალივით ამობრწყინება,
ათიათასჯერ წრე შემოხაზე, —
მე შენი მზერა არ მომწყინდება.

იქნება გიკვირს — მკითხავ, რად არის
შენზე ოცნება დაშარბათული, —
როცა სხვა გიზის გულის ბადალი,
როცა სხვასთან ვარ ტრფობით გართული.

მკითხავ — ეს მღერა ნეტავ რამ შობა,
გულს შენზე ფიქრებს რატომ არ ეუშლი?
— ჩვენს თავზე მეტად გვიყვარს სამშობლო,
ერთად ვართ უფრო დიდ სიყვარულში!

1939 წ. თებერვალი,
თბილისი.

გალაკტიონ ტაბიკის

შენი ლექსების სიტბო მინახავს
და ღღეს კი გავხდი შენი მნახველი.
ყრმობის წლებიდან შემოგვინახავს,
პოეტო, გულში შენი სახელი.

გვახსოვს: წარსულში ბრძოლით იარე.
მაგრამ გზები არ გამოგიცვლია.
და ოქტომბრის მზეს რომ ეზიარე,
ჩვენი ცხოვრება მაშინ გიცვნია.

წინათ გტანჯავდა ქვეყნის წარსული.
და რომ დარდები გადაგეყარა,
გვესმოდა შენი ხმა გაბედული:
„დაჰქროლე, ქარო!“... „დროშები ჩქარა!“

მალე დროშებმა ფრთების დარხევით
გამართეს ძირს და ცაში მარულა,
მზეს მოვაშორეთ შავი თალხები
ჩვენი სამშობლოს სასიხარულოდ.

ახლა მზე ნათობს, ბნელი გამქრალა,
„რადგან მშრომელ ხალხს ასე ენება“,
მშრომელი ხალხის გამოჩნდა ძალა,
„გაშუქდა ღიდი ბედნიერება“.

„გაცოცხლებულა ირგვლივ ყოველი,
მფეთქავი ძალა არეს ჰფენია“,
გახსოვს? ამბობდი: „ქვეყნად ღიმილი
შეხედეთ, ახლა რაოდენია“.

„ეს რა ბრწყინვალე მზე ამოენთო
რა ჟრიამული გადაიჟღერა?“
ეს სიმღერაა შენი, პოეტო.
„გამარჯვებული ბრძოლის სიმღერა“.

აჰა, შეხედე, რარიგად ემღერით,
„რიგორ ანათებს დროების თვალი“,
და რარიგად ჩანს ღღეს მშვენიერი
ჩვენი სამშობლოს მხნე მომავალი.

1939 წ.
თბილისი.

და ბოლოს შენთან

დადგა ახალი წელი,
შევხედი პირველი მგზავრი,
ისევ აქა ვწერ წერილს
და ისევ შენკენ ვგზავნი.

არის ბარაქით თოვა,
ცის ფერიების ცვენა.
ერთხელ იქნება მოვალ,
თუ გაიხარებ შენაც.

ახლა არ ვიცი რა ვარ,
მდაღავს დარღების გროვა.
კიდევ ვიცოცხლებ მრავალს
და ბოლოს შენთან მოვალ.

კიდევ ვიცოცხლებ მრავალს
უჩვევ ბუნების მჩენი.
ქების ოლიმპზე ავალ
და მაინც შენი ვერჩები.

და თუ პროსპექტზე მნახავ,
მქონდეს გაწვდილი პეშვი,
განმიკითხავე გლახაკს
შენი თვალების ეშხით!

1939 წ. 1 იანვარი.

ოთარს

ისევ ისეა ჩვენი მინდორი
ვარდებით, კრუხით და წიწილებით.
ცა ისევ ტირის უამინდობით,
მოაქვს ბავშვების აწიწინება.

ზოგჯერ მიდამოს ბალახავარდნილს
ქორი დაჰხედავს ოხერტიალი,
გასძახებს დედა, თავის ყავარჯნით
ეზოს დარაჯად მოხეტიალე.

მაინც წყეულმა მოგვტაცა გუშინ
თაუაქორილი ერთი ნაცარა.
კრუხმა ტკივილი რომ იგრძნო გულში,
მან ჩემი მშობლის გულიც დაცარა.

გაუჯავრდება ფიქრს დედაჩემი.
მაინც ღონდება, ღონდება ეგზომ.
შენ, კარგო, ისევ იქეთ დარჩები?—
ერთი წიწილი აკლია ეზოს!

აქეთ მოგვხედუ. აგრემც იხარე,
დაგვიანება სიმშვიდეს გვართმევს.
გიცდით, მოგელით ამდენი ხანი,
დედის წვალებით გაზრდილო მართვე.

1940 წ
ცაგერი.

მე თვითონ მივალ!

„გაფრინდი, შავო მერცხალო,
გაპყვევ ალაზნის პირსაო,
ამბავი ჩამომიტანე
ოშში წასული ძმისაო“.

ხალხური

ნურც ულამაზეს ლაქეარდს გასცურავ,
ნურც წყალს გაპყვები, შავო მერცხალო!
თუმცა ომშია უკვე გასული
ჩემი ძმა უღვაშ-შეუვერცხლავი;

დავემშვიდობეთ თბილად ურთიერთს,
ტკბილი შეხვედრა დავთქვით ზეალისად..
შემდეგ ვინ იცის სად არ უთია
ღამე სიმტკიცეს ჩვენი მხარისას?!

ვიცი საზღვარზე იდგა გულგაშლით:
სძულდა ლაჩრობა. ეგზომ ნაძრახი,
ვიცი უსმენდა სოსო ჯულაშვილს,—
სამშობლოსათვის მამაც დაძახილს.

უსმენდა მას და თვითონ ვიგრძენი,
როგორ გრგვინავდა მტრების მსახვრელი,
ბეერს შეუმოკლა ღღელა სიგრძენი —
სტალინისა და ქვეყნის სახელით.

... შავო მერცხალო. არ გთხოვ გაფრენას
ჩემი ძმის ამბის შესატყობადა,
მასზე იციან ღღეს ყველაფერი
ჩვენმა აწმყომ და ჩვენმა მყობადმა.

თვითონ გაეყვები, ჩემო ფრინველო,
ველებს — ალაზნის წყალით შეცვარულს,
მე სახლიკაცი თვითონ მიმელის,
რომ დაცემული სწრაფად შევცვალო.

შენ კი, მალხაზო, სჯობს აქვე დარჩე.
დაისაკუთრო კუთხე აივნის,
ჩემს გმირობაზე უთხარ დედაჩემს,
შენს ბუდესთან რომ ახლოს გაივლის!

არ დამივიწყო გულის მეტოლეც,
მთლად შენი ფერის თვალები რომ აქვს,
ხალხს გამოადგეს, კარგად მეყოლოს.
მის ძღვნად ვაჟკაცის სახელი მომაქვს!

1941 წ. 28 აგვისტო.

ხშირად გაყვები
ფიქრთა ქარავანს,
ეჰ! ჩემი ბედი,
ცამ აგარიდოთ
მოშორებული
სახლს და ტალავარს
მეც ვიბრძვი სხვების
სამაგალითოდ...

როგორც ეული ბერი ხეივნებს,
გაყვები ფიქრებს,
ხეცას დავიარ...
ო! საქართველო!..
განა ვიხილავ
შენს მთებს, შენს კოშკებს,
თერგს და დარიალს?

1942 წ.

**როგორ გიხმობდი,
როგორ გნატრობდი**

გიგა ყურაშვილს

როგორ გიხმობდი, როგორ გნატრობდი, —
ნათელ დღეს ჰკითხე, ღამეს განათევს.
მე შენ გეძებდი, ბიჭო, მარტოლენ,
მე შენ გელოდი, — არა ბარათებს!

..რად მომავონე, რა დღენი გექონდა
სიცოცხლით კიდევ მრავალწლიანებს?
გარდასულ დღეთა ამწერ სტრიქონით
რა უცნაურად ამაწრიალე!

ახლა ბავშვივით მომენატრება,
დედის მსურველი თოთო ბავშვივით,
ჩვენი ლეჩხუმის მთები, ტატნობი
და გაზაფხული ფოთოლგაშლილი.

მომენატრება „ვარალალო“ და
„რისთვის ტიროდნენ თუში ქალები“.
მომენატრება — ცა რომ ლალობდა
და შარა, ჩვენგან ნაგრიგალევი.

ხან გრგვინვით, ხანაც განაბებითა
ვსდევდით ოცნების ლამაზ ქიმერებს,
ხან ქუთაისის დარაბებიდან
გადაუკიოდით ჰანგებს იმერეთს.

ჰე რა დრო იყო! დარჩა სილაზე
ჩვენი ბავშვობის ნაოცნებარი,
ლურჯი იების თელავს სინაზეს
ატეხილ დღეთა საოცრებანი.

რარიგ მომწყურდა შენი დანახვა,
რომ გამიმთელოს გული ნასეტყვი.
ჩემთან არა ხარ, გვერდით არა ხარ
და შენს მაგიერ ქალაღდს რას ვეტყვი!

რა შეუძლია ბარათს, აბა რა!
არ ესმის დროის ნაგრიგალევი.
მას სხვა რა ძალუძს, რაც დააბარე,
ისიც ძლივს მითხრა დაგვიანებით.

მე შენ გეძახი, ბიჭო, მინდა რომ
აქაც გვადიდოს ძმობის ნამუსმა.
უუშველოთ ზეცას — მარად იდაროს,
უუშველოთ მიწას — მტრისგან ნამუსრალს!

უუშველოთ მზარეს — არ გაგვიხუნოს
უბე. ტკბილად რომ გამოგვიკვალთ!
შეიძვე ღენიხუმის ცა დაეიხუროთ
და ისე ეჭექოთ, ჩვენ რომ გვიყვარდა.

1942 წ. მაისი.
ჩრდილო-დასავლეთი.

ჩვენო რკიპკბილო დედილო!

გახსოვს ის წამი, დედილო,
კარზე რომ მოდგა მტერიო?
სამ შვილს დაგეძახე — თქვენს შორის
არ ვფიქრობ მხდალი ერიოს,
ადექით, შეიკაზმენით,
რომ მტერი მოიგერიოთ!...

ასე მღეროდით ტოლებში —
„თუ იქნებაო ომი ხვალ...“
ხედავთ, ომია... თქვენ იცით —
რა სიამაყით მომიხვალთ!
ცუდად არ გზრდიდათ დედაი,
გალალებულნი ლომნი ხართ.

დაგეძახე, გამოგვაცილე,
თვალში ჩაგიდგა ნათელი,
ხარობდი — ომში წავიდნენ
შენგან გაზრდილი მართვენი, —
სამი გულადი ვაჟკაცი,
სამი გულადი ქართველი.

თვალს ცრემლი არ დაგდენია,
ნურც მომავალში გედინოს.
სახლში დაგვირჩი მშვიდადა.
ჩვენო რძეტკბილო დედილო!
ისე დასძახე, მაგ ხმამაც
გმირობა გაგვაბედინოს!

სამი დაგვზარდე ვაჟკაცი,
სამივე ვეფხის ბწკრიანი,
ქვეყნის საყვარელ შვილებთან
შენი ვაჟებიც კი არი, —
ხელში უჭირავთ გორდაი,
მისით რომ გააქვს წკრიალი.

ხელში უჭირავთ გორდაი,
წინაპართ გამოპირული.
მას ან სიკვდილი სჩვევია,
ან დაბრუნება გმირული, —
დედი, მოგივალთ ამაყად,
მტერს დარჩეს სისხლის ბინული!

1942 წ. 10 აგვისტო.
ჩრდილო-დასავლეთის ფრონტი.

ორი ლექსი დღიურიდან

I

ურთერთს რა ტკბილად გავესალამეთ
შენ ჩრდილოელი, მე სამხრეთელი-
მოვსულეარ გურჯი აბესალომი
და მიპოვნიხარ ჩემი ეთერი.

რა ეუყოთ, მწყემსი არა გქეიოდეს,
ცხვარს არ უდგებარ მთაზე შეუენილს.

არც მე ვარ მეფე, გვართ ზეიადი,
ღა ჩვენ ერთმანეთს უფრო შეეფერით.

1943 წ.

4 აპრილი.

II

ბვირი მიჯდება, თუნდაც იაფი,
სულ ერთი არის—თვალთმაქცობს ფოტო.
ეს მე არა ვარ! ფერის კიაფით
მე შემოდგომის მოვგავარ ფოთოლს.

ეს მე არა ვარ! ვერ ვცნობ ვინ არის!
რად ფარავს სახეს ნისლით ლეგათი,
ეს ფოტოგრაფის ნაცოდვილარი
ჩემი არსების მოჭგავს ნეგატივს.

ეს მე არა ვარ! ჰკითხეთ დედილოს,
თუ ბგერა მწამდა წუხილის ზართა,
მე მუდამ თვალეზადაწმენდილი
დედის მხიარულ ნანიანამ მზარდა.

არა, მე არ ვარ, უმწუხარესი
ვშთები, როს ვხედავ სახებას დაღლილს,
ღა მეგობრობის ამ ღიდ მზარეში
უმეგობრობის მაჩნია ღალი.

ეს მე არა ვარ, მე ზომ ამქვეყნად
ქვაც მმეგობრობდა, რტომწვანე ხენიც.
ღამიღასტურებს ჩემი თაობა,
რომ მე სიცოცხლე ვატარე ლხენით.

1943 წ.

ჩრდილო-დასავლეთის ფრონტი.

დედი, იქნებ შენ გამაგებინო

...გახსოვს, ძამიკო, როგორ ვისურვეთ
ცხოვრების ბედის მზეზე მინდობა,
 მის ახლოს ყოფნა სულ და...
შემდეგ ბავშვობის ზღვართან მისულებს
გეტანჯაედა ზეცის უამინდობა,
 მზის შეჩერება გვსურდა.

გვეგონა იგი ზეცის კაბადონს
ძირს ჩამოჰყვება და ლალ საეანეს
 გვესოს მთა-ველზე გაშლის...
„მო, დავედვენოთ მნათობს გაბადრულს,
ისე მცირე ჩანს მისკენ საეალი,
 ვერ შეაშინოს ბავშვიც!..“

გვიან გავიგეთ — ჩვენ რომ ვინატრეთ,
სხივთა ციალით თვალს რომ გეტაცებდა
 ის უცნაური რამე,
თურმე გვესოვიც არ იბინადრებს
და ჩვენს ლუხვანელ სახლიკაცებთან
 სადღაც ათენებს ღამეს.

და ისევ ქვევით, ისევ ცაგერი,
ღალმართზე ორ ბიჭს, ღარდით გათოშილს
 ჩამოგვეყვებოდა მწუხრიც.
ჩვენს სანატრელს რომ ვერ მივაგენით,
თაყებს ჩაერგაუდით ბებოს კალთაში
 და უმზეობას ვწუხდით.

ახლა აღარც მზე, აღარც ბებილო,
მიმაღავს შარას ახლა მისკენაც
 ჩემი უბედო ბედი.

დედი, იქნებ შენ გამაგებინო,
საით ღუღუნებს ჩვენი მზის კერა,
 ჩვენი ბავშვობა, დედი!..

სად ვარ?..

„ჩვენ ყოველთვის გვინდა ვიცოდეთ —
როგორ ან სად ხარ, მასწავლებლო“.
ბავშვთა წერილიდან.

ის ერთი ღამე... ტყვია ელავდა,
არ დამავიწყდეს, მგონი, მარადის!
ნაღმმა ამინთო ცეცხლი კელაპტრად
და წავიკითხე თქვენი ბარათი.

რა თბილი იყო, რა მაზლობელი,
რა საყვარელი ახალწელივით, —
თქვენი ამბების ჩემთან მთხრობელა,
თქვენი პატარა თეთრი წერილი.

უვლია, თურმე, არც ისე დიდხანს,
ულახავს სიერცე მათა, ვაკეთა...
მომიყვანა თქვენზე და ბოლოს მკითხა —
როგორ ვარ, სად ვარ, ან რას ვაკეთებ.

მე ხომ მანდ დამრჩა წიგნი, კათედრა,
ტკბილი დღეები სიყრმის ხანათა!
ახლა როგორ ვარ? ღამეს ვათეთრებ
ჩემი სამშობლოს გასახარადა!

ვერ ვხედავ იმ მთებს, იმ ძველ ფშიარებს,
აქ საქართველო თვალით არა ჩანს...
მაინც სადა ვარ? შორს არ შრიალებს
ქართან შეზრდილი ჩემი ფარაჯა.

აქა ვარ. მტკვარმა გამომაცილა,
სამშობლოს მტრები აქეთ მეგულის.
ახლა მეც ქვეყნის ერთი კაცი ვარ
მტრებზე ნაღმივით აფეთქებული.

აქ გაიწვია გული მგოსნური
მიწამ, ღროებით მტრისგან ნაღალმა.
ისევ თქვენთან ვარ, არ წამოვსულვარ
ცხრა მთას იქეთ და ცხრა ზღვას გადაღმა.

ისევ თქვენთან ვარ, თუმც გზების რიგით
სიერცე ჩვენს შორის გაგრძელებულა...
პუშკინისა და შევჩენკოს ირგვლივ
მინდა მოგითხროთ კელაე ძველებურად.

მტრებს უსურვიათ – წაბილწონ განგებ
მათი სახელი დასადაფნავი...
მეც აქ მიხმობდა პუშკინის ჩანგი
და შელახული მგოსნის საფლავი!

აქეთ მიხმობდა გორკის სამშობლო,
მგოსანთ კრებული, ყველა უკლებლად...
აქეთ მიხმობდა ჩემი ბავშვობა,
ბედნიერ ლექსით დაჭაბუკება!

აქეთ მიხმობდა ცეცხლი მშფოთავი,
მოხუცთა კენესა, ბაღლთა ტირილი!
გამომაგზავნა აქეთ შოთაიმ
ძმობის მოყვარე ავთანდილივით.

და, ეიდრე ძარღვში სისხლი გაშრება,
ჩემს გმირ წინაპარ ქართულთ ვედრები!..
აი, სადა ვარ, კარგო ბავშვებო,
აი, რად დამრჩა სკოლის კედლები!..

1943 წ. 9 ივნისი.

ჩ ე მ ო მ ა ზ ა რ ა ვ

ჩვენ დაემშობილდით,
ჩემო მაზარავ,
სამშობლოს სითბო
თან დამაქვს შენით.
ბრძოლის ქარცეცხლში
არც მე დაუმზრალვარ,
რომ გავიარო
გზა დანარჩენი...

დაე, ესმოლეს
ლამეს განათევს
ჩვენ ამ ბრძოლაში
რას ვეზიარეთ!
სანამ ბერლინში
ცეცხლს არ დავანთებთ,
ვივლით ცხოვრების
თანაზიარად...

როს გავიმარჯვებთ,
ვით რელიქვია,
გულს გაუხარებ
ვიცი შენს მნახველს.
და თუ კი დამცა
ვერაგის ტყვიამ,
მაინც შევირჩენ
გმირობის სახელს.

მანამდე ბრძოლის
მეგობრად იყავ!
და კელავ სამშობლოს
სითბოთ გამათბე.
მე საბოლოოდ
მაშინ გაგწმინდაე,
როცა ბერლინში
ხანძარს ავანთებთ!...

1944 წ. იანვარი.

ჩრდილო-დასავლეთის ფრონტი

მ ა ნ ა ს თ ი ა

რა საჭიროა გითხრათ ეინ ვარ,
ან რა, ან როდის
დავემბობილუ სიცოცხლეს ან სიკედილს
სისხლიანს...
ხომ ხედავთ, აქ ვარ და ჩემი მზე
აღარ ამოდის...
დაუფულებივარ ამ სივრცეს და ამ ველს
ნისლიანს...
იცოდუ მხოლოდ, ამხანაგო
შთამომავლობავ!
გული მიმქონდა იმ საქმისთვის
ქვად და აგურად.
რომლისთვის შენ დღეს მადლიერი
ამბობ მადლობას!
— აი, ამიტომ მომიგონე
ამხანაგურად...

1944 წ. 5 აპრილი.

ჩრდილო-დასავლეთის ფრონტი.

შეტევის წინა დღე.

ფართვული ნაკიდეხი

დედა, ნინა, ქეთო!

მეორე დღეა მივდივართ. ამბობენ შორი გზა გეაქვს წინო. რაც უნდა იყოს, თავს ისე ვგრძნობ, თითქოს სახლისკენ ვბრუნდებოდე ქვეყნის წინაშე ვალმოხდილი; ჩემთვის ხომ ნაცნობია წინათ გაუღილი შარები უკრაინისაკენ. შინდა უფრო უცხო მხარეში მოვხვდე, ისეთში. აქამდე რომ არ მინახავს — ბევრ ინტერესს დააკმაყოფილებს ჩემი ბუნტარული ბუნებისას.

ჩემზე არაფერია. სადარდო, გარდა იმისა, რომ შორს ვიქნები თქვენგან და ქუთაისურ სიახლოვეზე ნაჩევებს. შეიძლება მე თვითონ გამიჭირდეს ეს დაშორება. როცა დავიმკვიდრებ, მისამართს გიღებუშებთ.

„კომუნისტში“ თუ დაიბეჭდა ჩემი რაიმე (ლექსები დაეტოვებ ამხანაგებთან გასაგზავნად), ამოჭერით, გამოგზავნეთ.

დედას მოუარეთ — აი ჩემი კარგად ყოფნა.

გოცნით კოლია

12. 10. 41 წ.
ბაქო.

დედა, შუშანა და ქეთო!

გასაგებია, გამწვანდეს თქვენთან მიმოწერა; მტერი კავკასიის კლდოვან კარიბჭესთან ღვას უკვე, მაგრამ თუ თქვენ ამას დაურთეთ ზოგჯერ ჩვეული სიზარმაცე, ბარათს, ალბათ, მთელი წლობით ვერ მივიღებ.

რუსეთში შემოდგომის უკანასკნელი ორი თვე ზამთრის კუთვნილებაა. ახლა აქ ისე ცივა, როგორც ჩვენში დეკემბერ-იანვრის თვეთა მანძილზე. მაინც კარგად ვარ. თითქოს ყოველივეს

შევეჩვიე. სახლში ძილი მენატრება მხოლოდ ამდენი ხნის უძინარს; მენატრება დედას ფუსფუსი, ქეთუნიასთან შეძახილები, ჯუკაიასთან — ზღაპრობანა და „არსენა ბიჭოს“ მღერა. მახსოვს, ლექსს ვწერდი ერთხელ — „ლეჩხუმურ ღამეს“. ასეთ დროს ძნელია შენთან იყვეს ვინმე. ჯუკაია კი არ მშორდება, თუმცა მინდვრად ბურთიც გავუჩინე, ჩემთან ტრიალებს. როცა ლექსს ჩემთვის ვკითხულობ საგრძნობი ჩურჩულით, ისიც იმეორებს და მალე მან მთელი ეს ლექსი ზეპირად იცოდა, თუ ახლა არ დაივიწყა. ჰკითხეთ აბა! ასე იწყებოდა ის:

„თეთრია თოვლი, ღამეც თეთრია, —
ბარს ეწვევიან მგლების ურდონი;
ვინ იცის — წუხელ სად არ ეთრიენ,
სად არ გატეხეს ბაჟის ურდული...“ და სხვ.

შუშანა მწერს — ლექსებს ეტანება, შაირობს კიდევ ჯემალიო. კარგია. ნუ გადატვირთავთ მხოლოდ. მოაგონეთ, რომ მამამისი და კოლია ბიძია ამ მხრივ საკუთარმა სიზარმაცემ წაახდინა.

ვიგონებ — ცუდად არ დავიწყე. საბჭოთა მწერლების ორგანოში დამბეჭდეს (ჟურნალი „ჩვენი თაობა“ — სამჯერ), ცენტრალურ მასიურ პრესაშიც — „ნორჩი ლენინელით“ დაწყებული „კომუნისტიტ“ გათავებული. მწერალთა კრიტიკამ „ლიტერატურული საქართველოს“ ფურცლებზე ორჯერ ქებით მომიხსენია... შემდეგ კი ვიწყე სიზანტე, ფეხბურთობანა და იაფი გართობა. წელიწადში კი თითო ლექსის ბეჭდვით ვკმაყოფილდებოდი. ახლა ეგრძნობ ყოველივეს, ან რათ მინდოდა ალბომატებისათვის ამღერება?! რამდენი ლექსი, და ზოგი კარგი ლექსიც მაქვს გაფანტული გოგონების ალბომებში. ნეტავ ახლა ისინი ერთად მომაგროვებინა! სახლშიდაც ბევრი დავაბნეე უგზო-უკვლოდ. თუ ცხოვრება შემთხვევას მომცემს, ისევ უნდა დავუბრუნდე და თავიდან დავიწყო ყოველივე. მანამდე კი თქვენ არაფერი დამიკარგოთ მანდ. რაღაცები მქონდა ჩემოდანში (პოემა აკაკი წერეთელზე და სხვ.). თუ რაიმე ნახოთ ლექსური, თუნდაც ერთი სტრიქონი ჩემი ნაწერი, შემინახეთ, ამით ბევრ სიკეთეს მიზამთ. ჯემიკოს და ბავშვებს კი შეაყვარეთ ლიტერატურა, მაგრამ მათემატიკაც უნდა უყვარდეთ!

ფრონტი გაიხლოვდებოდა? თქვენთვის ახალი იქნება ჩემგან გაცნობილ დღეთა საოცრებანი. ჩვენი არმია უკვე ნაცადია, მტრის ტაქტიკის მცოდნე. ძნელად ეინმემ წაიღოს მიწის მეტრიც, კი! წინ თუმცა ბევრი რამეა მოსალოდნელი, — მაინც უნახავთ ერთმანეთს. დედას სიბერე არ უნდა შეეტყოს — იმღეროს, იმხიარულოს. მისი შეილებიც მღერიან მისგან შორს. ეს სიმღერა ისევ მათ და ირგვლივ ახლო მდგომ ამხანაგებს ესმით მხოლოდ. არტილერიის კანონადა, თვითმფრინავთა ყუმბარების გრიალი და ტყვიამფრქვევთა განუწყვეტელი ტკაცანი ჩვენს ხმას მანდ ვერ მოაწვდენს, მაგრამ მაინც იცოდეს მან. დედამ. როცა ჩვენ ვმღერით და ისევ ის ჯეელი და მხიარული კოლია ჩამოვალ მანდ, ისევ ის ლეინომოყვარული და გოგონებში ეშმაკი (თუმცა სახლში ჩუმი და დარბაისელი) ოთარი მოგივათ, დედაც ისევ ის უნდა დაგვხედეს — ოთარიმ რომ დატოვა 1939 წლის ზამთრის ყინვიანი დღით, მე რომ დაეტოვე იელისის მზისქვეშ.

ნინასაგან წერილი მივიღე — დიპლომი ავიღეო შენი. არ ვიცი როგორი დიპლომი აიღო. მე რუსულ ენა-ლიტერატურაში სახელმწიფო გამოცდებზე კარგი შეფასება მივიღე (რუსული ენის არასაკმაოდ ცოდნის გამო). ამან შემიშალა ხელი პირველხარისხოვანი დიპლომის აღებისთვის. არ მინდოდა ახლა დიპლომის აღება, თუ ის პირველხარისხოვანი არ არის. პროფესურა შემპირდა ასეთის გაცემას (ყველაფერში „ფრიადები“ მქონდა; ორიოდ „კარგი“ მხოლოდ — მთელ მანძილზე. ნახეთ ჩემი მატრიკული. მანდ შეცდომით შანიძემ „საკმაოც“ კი ჩაწერა ერთხელ). ახლა შემეძლო რუსულ ენაშიც წარმატებით ჩაბარება...

(წერილს დასასრული აკლია)

მ ა რ ო!

რამდენი ხანია შენთან წერილით არ მილაპარაკნია. მგონა ქუთაისის შემდეგ აღარ მომიწერია რაიმე. შენი წერილი იმერეთის დედაქალაქში მივიღე ჩემი აქეთ გამომგზავრების დღეს. ახლა თან მაქვს და სხვა წერილებთან ერთად მეასედ ვკითხუ-

ლობ მის სტრიქონებს. რას იზამ. მეოთხე თვეა საქართველო-დან არაფერი იღიწი და მხოლოდ გამოყოფილი წერილ-სურათებით ვიკლავ¹ განსატრულობის სურველს.

დედაზე ფიქრები არ მშორდება. ვინ იცის რას არ გაიფიქრებს იგი შეილებზე. მე კარგად ვიცი მისი ამბავი: განმარტოება იცის, გაკიდვანება. და რაკი თავს მარტოდ დაიხელებს, ფიქრობს და ტირის. გარეშეს კი ცრემლებს იშვიათად აჩვენებს ასე რამდენჯერმე დავიჭარე იგი: ოთარიზე ხშირად აცრემლებულა, ახლა მეორე ვაჟზეც. და იქნებ, ვინ იცის, მესამეზე და სიძეებზეც გაუხდა სადარდო! (თუ ისინი გაიწვიეს). საქმე იმა-შია, რომ „შიშს დიდი თვალები აქვს“ — განსაკუთრებით ზურგ-ში და არა ფრონტზე, თორემ აქ არაფერი ისეთი არ არის, რომელზედაც ღირდეს შემოფოთება. ხალხის მოწინავენი ყველანი აქეთ არიან. წარმოიდგინე — დედასთვისაც თუ იქნებოდა კარგი მისი ვაჟების მანდ ყოფნა ომის დღეებში! ყველა დასცინებდა მის შეილებს და მასაც. დედათა შორის რჩეულ დედას, ბევრი მოწიამენია და გადაუტანია მის არსებას. ახლა უფრო მს... უკი ტვირთია გადასატანი. ომი დამთავრდება და ჩვენც მანდ ერთ ჯანმრთელნი და გამარჯვებულნი, მანამდე კი მინდა, რომ მანდ დარჩენილი მოკეთენი ყველა დედის ირგვლივ იყოს. მოხუცებულობამ არ დასძლიოს, თორემ სხვა სადარდო არაფე-ქნა. იქნებ მზიარულობასაც უშვა ხელი — აქაოდა „რა მემღერე-ჭო“... მისი შეილები ტყვიის ცეცხლში მღერიან. ჩემი ფანდუ-ჭოთ, ბომბარდირების დროს, ვაოცებდი მებრძოლებს და ამხანაგ მეთაურებს — „ბავშვი ხარო, სისხლი გიდუღსო“. სიმღერა ჩემი ჭარგი ამხანაგია. ვიცი ოთარიც მღერის სადღაც ჩემთან ახლოს, (მწერდა „გიტარას დავემეგობრეო“). დედამაც იმღეროს და გუგლისოს. შეილები მანდ ხარო, იგი მზიარული და ძველე-ჭური ჯანით უნდა დამიხვდეს.

„გულის მეუღლეზე“ მწერ და მთხოვ გითხრა რაიმე ამაზე. დაოჯახებაზე არ მიფიქრია აროდეს დღემდე: ასპირანტურა მი-ტაცებდა, პოეტური განწყობილების ჩემი ბუნება არ ჩერდებო-და ერთ ასულზე... ვაჯადოებდი მათ არა სიტყვიერი თილის-მით, არამედ ჩემი მზიარულებით და ცეკვა-სიმღერით. ლექსე-ბიც ბევრი დამტყუეს მათ... ვფიქრობ, რომ ეს წლები ჩემი მაჭრობისა და დადუღების წლებია. ამ წლებს ასე სჩვევია და

ალბათ, როგორც სწავლის წყურვილს მოვიღა, ამ თამაშობანასაც ბოლოს მოვუღებ... ზოგჯერ ვლექსად, ღეც. პატარა რეეული ავაკსე ჩემებური სტრიქონებით.

დანარჩენზე და უფრო დაწერილებით შემდეგ, როცა შენს წერილს მივიღებ.

თქვენ იცით მანდ და დედამ. შენი პატარა ბავშვების სურათი გულთან მაქვს. ედიშერი მაგიჟებს ფოტოგამოსახულებით. ასეთია ნამდვილად?

მწერეთ და მწერეთ. ჭიჭიკო სად არის? დაემათაერე უნივერსიტეტი, ეფიქრობდი ყველასთვის მიმეზღო პატივისცემისა-მებრ და პიტლერმა კი არია სუფრა. ალბათ იგი ჩემგანაც მიიღებს მცირეოდენს. მოიწერე თუ იცი რეზო სად იმყოფება ახლა. თუ თბილისში ლექსაობს ისე?

გოცნი და გოცნი. შენი კოლია.

10. 2. 42 წ

ქ ე თ ო!

ეს მერამდენე წერილია, ალაჰმა უწყის! თქვენგან კი მაინ არაფერი ისმის. ნეტავ თუ ცოცხალნი ხართ ყველანი! ჩემს შესახებ დედას უთხარი, რომ მოვალ იმაზე უკეთ, ვიდრე მა-ვიყავი. ჩრდილოეთის პაეა ჯანისთვის კარგია, გერმანელმა ფრიცებმა კი ჯერ ვერაფერი დამაკლეს. შვილები სადარდო-არ დაბადებია მას.

ოთარიზე თუ გესმით რაიმე? მე თქვენს პირველ წერილთ-ერთად ველი მის მისამართსაც. ფრონტიდან ფრონტზე მიწერ მოწერა ძლიერ ადვილია, მასაც მალე მოვნახავ და ქალაღ-ბით მაინც ვისაუბრებთ ჯერჯერობით.

ხედავთ ამ წერილის ზემოთ მოთავსებულ სურათს? ასეა ნამ-დვილად: დღედაღლე წინ მიდიან ჩვენი ნაწილები, ყოველ სა-ათს მოსდევს ახალი, მორიგი ტერიტორიების განთავისუფლება. ზამთრის ბოლო ჩვენს მიწაზე ადოლფ ფიურერის ფინიათა ყოფ-ნის ბოლოც იქნება ალბათ.

ჯერ დავით კოპალიანის ძველებური სიმხნევით ვარ, ჩემს ახალგაზრდობას მხოლოდ რუსული ზამთრის სუსხი აშინებდა, თორემ იარაღი გერმანელებზე ნაკლები არც აქ გვაქვს. აღმოჩნდა, რომ ფრიცებს ჩემზე, ამ სამხრეთელ ბიჭზე უფრო ჰშინებიან ზამთრისა. ჩემს თბილ ტანსაცმელს პაპანინელთა ბანაკშიაც ვენდობი. ასე, რომ მათი და მამიდაჩემის ლოცვა-კურთხევით, ვფიქრობ, ზაფხულის რომელიმე თვეში ძველნახიდვარიდან წისქვილის გზით სახლში მოვალ (წისქვილი თუ არ დამხვდა, გზა ამეზნეა).

ახალი აქეთ არაფერია — ძველ ტერიტორიებს ეიბრუნებთ უკან მხოლოდ. მანდ რა გაქვთ ახალი? ვინ გათხოვდა, ვინ ითხოვა და სხვ. ბიჭოლიას ქორწილი მესიზმრა. მართალია? ნუცი როგორ ცხოვრობს? ქეთუნია, შენც არ იუიქრო გათხოვება. „თლა ისე კი არაა საქმე კუჭა, ჩამოგივა ცოცხლად შენი სოლომ-გოლომი. დაუცადე ერცახე“. ამ მოგურულო ფრაზაზე იპოლიტე ქვილორია გამახსენდა. მომწერეთ მასზე თუ იცით რაიმე.

სხვათაშორის. ნინას უთხარით, თუ თბილისში ყოფნა მოუხდება, აიღოს უნივერსიტეტის დამთავრების დღეებში ფაკულტეტის მიერ გადაღებული სურათი. მიაკითხოს პლენანოვის 147 ნომერში (თუ 146). არტისტ საღარაძის ბინაში ჩემი ამხანაგი ევგენ ჯეირანაშვილი ცხოვრობს, იმან იცის ყოველივე. ან მასთან იქნება. ან თვითონ მოუტანს ნინას ბანაზე (ამაზე ადრე ვუთხარი მას). ასე რომ, ნუ დაკარგავთ, ხუთი წლის მანძილზე ერთად შეზრდილ ამხანაგებს შორის ვარ მანდ და მინდა სახლში დამხედეს ეს სურათი.

მოკითხვა ყველას. გკოცნით და გკოცნით! თქვენი კოლია.

25. 2. 42. წ.

სალამი ლაღო!

რას შერება შენი რედაქცია? დათიკო ყურაშვილი ხომ არ წაგართევს? იქნებ აივსო სტამბა და ყველა შენი შტატი ქა.

ლებით. კარგია თუ ერთი მამაკაცი შერჩები ამ ღარგს ძველ მუშაკთაგან.

მიშკოსგან წერილები მოგდის? მე მის შესახებ დღემდე არაფერი ვიცი. არავეისგან ჯერ კიდევ წერილი არ მიმიღია. მ ოქტომბერს დაეტოვე საქართველო. მას შემდეგ ქართული ასოები, სხვისგან დაწერილი, მენატრება.

თეატრი მუშაობს თუ რასა იქმს? რეცენზიებით უმასპინძლები?

რომ იცოდე, რამდენი რამის შესახებ შეიძლება ახლა წერა. გერმანელთაგან მიტოვებულ ცეცხლწაკიდებულ სოფლებში გაელისას უამრავ მასალას ნახავ გაზეთისთვის... ვწერ ღლიურებს, ორ სტრიქონიანს (ზოგჯერ როცა დროს ვნახავ). ვიცი ერთ დროს გამოდგებიან. დღეს კი ბევრი დრო ვიშოვე, შტაბში შევიარე და ვწერ წერილებს ათასი მისამართით.

ჩვენთან არის წინსვლა და გამარჯვება. ბევრ რაიმეზე მინდა ლაპარაკი, მაგრამ ამაზე მას შემდეგ. როცა შენს წერილს მივიღებ. მოკითხვა ნაცნობთ.

წერილი — ამის მიღებისთანავე!

ნახვამდე! მძური სურვილებით. კ ო ლ ი ა .

26. 2. 42 წ.

პ ა ტ ი ვ ი ტ ე მ უ ლ ო ბ ო ბ უ ტ ა !

ვბედავ ისევ წაგართვათ დრო ჩემი ამ სტრიქონების კითხვით. ვბედავ იმიტომ, რომ მინდა ვიცოდე ჩემს მშობლიურ მხარეზე, ჩემი ბავშვობის მეგობრებზე ცოტა რამ მაინც. თქვენ შეგიძლიათ, თუ პატივს მცემთ, მაცნობოთ მათ შესახებ. პირველ ყოვლისა გიგაზე და კოკიზე მინდა ვაეიგო — სად არიან ახლა ისინი? შეიძლება თუ არა მათთან წერილით დაკავშირება? სხვათაშორის, ამ ხუთიოდე დღის წინ გზად მიმავალმა დაეინახე კაცი, რომელიც ასლი იყო თქვენი შოთასი (უღვაშება ჰქონდა მხოლოდ გაპარსული), გავექანე კიჟინით, ქართული შეძახილებით. განზრახვა მქონდა მხიარული შეხვედრისა,

ყველაფერი კი დამთავრდა ჩხუბით, — კინალამ ტყვიამდე მივიდა საქმე; ვილაც რუსი აღმოჩნდა და, ჩვეულებრივად დედა შეიგინა, ამაზე ლეჩხუმურად მინდოდა პასუხი გამეცა, მაგრამ შემოსწრებულმა პოლკოვნიკმა გაგვაზევა.

გიგა და თოფი?! ლოლიას უთხარით — შენს ქმარს ხელთოფია თავის დღეში არ უსვრია და სად აგზავნიდი-თქო. შამხანა იმას კალამი არ ეგონოს, ან რუსეთის ცივი ევლები — გულთბილი „კომუნისტის“ ყოველდღიური ფურცლები. მას ის ურჩევნია სახლში დაბრუნდეს და მისი პატარა ვაჟკაცი გაუშვას სასახელოდ ფრონტზე, თორემ დაეკარგა გაზეთიც და თოფ-გატეხილი და ქარქაშ-ცარიელი მიუვა მეუღლეს სახლში (ვმასხრობ, თორემ... ღმერთმა აარიდოს ასეთი ლაფი!..)

ბათქს ისე შეეჩვია ყური, მგონი უმისოდ ვერ გაეძლო მალე და სამხედრო სპეციალობა ავირჩიო. ზშირად ტოლები მომენატრებიან, სიჭაბუკის მეგობრებზე ფიქრები მალონებენ. სად არიან ახლა ისინი? როდის შევხვდებით ერთმანეთს? რატომ ჩემთან ერთი მათგანიც არ არის?.. ავედევენები ბავშვურ ფიქრებს და შემდეგ ძნელია ჩემთვის ჩვეული მხიარულების აღდგენა. ამიტომ გთხოვ ამ წერილის მიღებისთანავე დაწეროთ ორსტრიქონიანი, ან იმდენსტრიქონიანი ბარათი, რამდენსაც მოითხოვს მისამართები გიგასი, კოკის, თუ იცით — იოსებ ჭაბუკიანის და მიშიკო ჩაკვეტაძის. ბევრს ვთხოვე ეს და არ შემისრულეს.

გულითადი მოკითხვა თქვენი ოჯახის მთელ შემადგენლობას! გისურვებთ ცხოვრების ბედნიერ დღეებს!

პატივისცემით კ. დ. კოპალიანი

26. 2. 42 წ.

თქვენ რა გითხრათ, მართლა!

გაიკვირვებთ, ალბათ, რატომ ვიწყებ ასე წერილს. თუ კარგად განსჯით, თვითონვე ახსნით, რომ ასეთი მომართვა თქვენდამი მართებულია; რა გაჭირდა ორიოდ სტრიქონიანი ბარათი?! ჩემს ირგვლივ აუტანელი სიჩუმე იქნებოდა, რომ მაზლობლად მყოფი რუსი გოგონა არ მიხსენებდეს მისი ზშირი წე-

რილებით. მწერს იგი, თითქმის ყოველ მეოთხე დღეს — მწერს სიყვარულზე ფიციტ. ცეკვით გაეიცანით ერთმანეთი მიხაილოვსკის კლუბის თაღებში და ახლა ურთიერთობას ქაღალდებით ვაგრძელებთ. იგი არაა ისეთი, რომელზედაც ღირდეს თქმა — „მთლად შენი ფერის თვალები რომ აქვს“ (ჩემი ლექსიდან გაზეთ „კომუნისტში“). ნამდვილი რუსია — მთვარისფერი... ასე რომ, გეშინოდეთ: რუს გოგონას ჩამოვიყვან მანდ. რომელსაც დედაჩემი ვერაფერს გაუგებს, თუმცა ცოტა რუსული კი იცის („სპიჩა“, „სტოლი“, „რუჩკა“ და მისთანანი). საქართველოდან არავინ არ მიხსენებს. სხვაზე რა ვთქვა — სახლიდანაც დამივიწყეთ.

ალბათ, ის უფროა დამნაშავე, რომ აქედან თქვენამდე წერილი მოგზაურობს ერთი თვის მანძილზე. იქედან აქეთ—ისევ ერთი თვე. ამგვარად, თუ ვიანგარიშებთ ბუხჩალტერ ნიკოია ფრუიძისებური სიზუსტით, თქვენი წერილი მარტის ბოლო რიცხვებში უნდა მივიღო.

წარმოიდგინეთ, 8 ოქტომბერს დავტოვე ივერის მხარე. მას შემდეგ საქართველოზე არაფერი ვიცი.

მანდ, ჩემს შემდეგ, იქნებ ცვლილებათა მთელი რიგია; იქნებ ბიჭიკო ლარცულიანმა ცოლი ითხოვა ან ნინა გათხოვდა (ადრეა ჯერ), იქნებ ჯუმბერი შვილის მამაა, იქნებ დედაჩემს ქორმა უკვე მოსტაცა ერთი-ორი წიწილა, იქნებ ქვეყანა ისე შეიცვალა, რომ ბუხია და მიშაია ფოსტიდან მოხსნეს, ან ვალიკო კოპალიანი ფოსტის გამგედ დანიშნეს... იქნებ... მაგრამ რაღა იქნებ, — ბარემ თქვენ მოიწერეთ ყველა ცვლილებაზე, მოიწერეთ ზამთარი როგორი იყო მანდ, ვინ და ვინ გაათხო ერთმანეთი იმ სიცივის დღეებში. გოგუცა ახელედიანმა ვალია არ ითხოვა? (ხო. ახლა ქალები თხოულობენ კაცებს).

ჩემს შესახებ: ისე ვარ, როგორც ნიკო სხვიტარიძე იყო კოოპერაციაში ტკბილი სამსახურის მანძილზე. ახლა ვისვენებთ რამდენიმე დღე, მალე ისევ გავალთ.

მამიდაჩემი მომიკითხეთ! წერილს არ ვწერ იმიტომ, რომ, რატომღაც, ჩემს მიმართ იზარმაცა წერილებით. მას ჩემი რამდენიმე ბარათი მართებს. მისი ლოცვა-კურთხევა აქაც მესმის. გადაეცით, გერმანელი ფრიცები, შენი ძმისშვილების წყალობით, შენამდე ვერ მოაღწევენ, მშვიდად იყავი-თქო.

სხვათაშორის წერილების მიღება ფრონტის პირობებში უფრო ადვილია. მიუხედავად ამისა, დღემდე ჩემთვის ყველაფერი შეუძლებელი შეიქნა. თუ ერთი წერილი მივიღე თქვენგან, — სხვა აღარა მინდა რა.

მოკითხვა შეზობლებს — დიდს, პატარას. დაიწყეთ იაკინთე ლიპარტელიანიდან და ჩაათავეთ დეიდა პასიკოს სახლით.

იცით? როცა თქვენგან წერილი არ არის, ასე ვუფიქრობ, რომ სახლში უბედურებაა რაღაც ისეთი სიდიდის. რამაც ფრონტზე გასული შეილები დაავიწყა დედას და და-ძმებს; იქნებ შალიკო არმიაშია? მაშინ შუშანას დასჭირდება ჯემიკოსთვის უწვეულო დედობა. რომ არ იგრძნოს მამის დაშორებით მოსალოდნელი გულისტკივილი. მას ვენაცუალე, ახლაც პარტმანდატის გვერდით მიდევს მისი ორი წერილი, ავჭალაში და ქუთაისში გამოგზავნილი. ვინ იცის მერამდენედ წავიკითხე ისინი. ერთი ლექსადაა დაწერილი: „ჯუჟაია მოშაირე ასე გითვლი კაპიტანო“ და სხვ. გადაეცით, რომ ლექსაობა ბიძამისსაც უყვარდა და უყვარს, მაგრამ ზარმაცობა სძლევს ხშირად-თქო. მან კი ახლაც შეიყვაროს ლიტერატურა, ხატვა და ბეჯითობა. სწავლაში კი ფრიადოსანი უნდა იყოს. ანზორიკა ყაჩაღის მუშტები მომენატრა! იგი, ვიცი, სწავლის პატარა გმირი იქნება. ნელიმ კი — წერილი მომწეროს... ეჰ, დამიკოცნეთ, დამიკოცნეთ ეს ჩემი პატარა მეგობრები!.. ახლაც მინდა, რომ ისინი ჩემს მხრებზე თარეშობდნენ!.

გოცნით. თქვენი კოლია.

20. 3. 42 წ.

დედა, შუშანა, ქეთუნია!

„დიდება და მაღლი ღმერთსა“... დღეს მივიღე თქვენი წერილი. წარმოიდგინეთ, დილით უწვეულო მხიარულებით წამოვდექე და ჩემი პირველი ფრაზა იყო — „დღეს აუცილებლად ჩემი წერილი იქნება საქართველოდან“. და როცა ნაწილში მორიგე კონვერტებზე გვართა წაკითხვა დაიწყო, ჩემი ამხანაგების გაკვირვებას საზღვარი არ ჰქონდა — წერილი მართლა იყო

და არა მიზაილოვსკიდან, არამედ თქვენგან. კარგი იყო მშობ-
ლიური სტრიქონების წაკითხვა. ვინ იცის მერამდენედ წავი-
კითხე ისინი და კიდევ მერამდენედ წავიკითხავ, ვიდრე მეორე
წერილს მივიღებდე თქვენგან.

კარგი იყო გეწერათ იმაზე, რაც ყველაზე მეტად მაინტე-
რესებდა. ჯერ ერთი. რატომ დედას წერილი არ იყო კონვერტ-
ში? მეორეც, ოთარის შესახებ არაფერს იწერებით. გარდა შუ-
შანასაგან მოწერილი შემადრწუნებელი ფრაზისა — „ოთარის
არაფერი ისმისო“. რას ნიშნავს ეს? რა ხანია მისგან წერილი
არ მივიღიათ? როგორი იყო მისი მისამართი უკანასკნელ ხანებ-
ში? არაფერია სამიში, რომ წერილებს ხანგრძლივი დაგვია-
ნებით ღებულობდეთ. ხდება ასე ხშირად. მეგონა არც ჩემგან
ღებულობდით ბარათებს... რა ვიცი. მე-ნ თვეა საქართველო-
დან მხოლოდ ერთი წერილი მივიღე. ოთარიზე მომწერეთ, იცო-
დეთ!

შალიკოც გაიწვიეს? რას იზამ!.. დრო ითხოვს. ჯემიკოს
წერილმა აღმაფრთოვანა. ლამაზი ხელი აქვს. ჭკვიანი ბიჭი
ჩანს... ეგრძნობ როგორ მდგომარეობაში იქნება შალიკო, მით
უფრო. თუ თქვენ წერილები ხშირად არ უგზავნეთ. მოიწერეთ
მისი მისამართი. ბედმა ქუთაისში არ შეგვახვედრა ერთმანეთს
და ქალაქდებით მაინც ვიბაასებთ. მისი ლექსი „ღია წერილი
ძმებს“ ჩემი ჯიბის მკვიდრია, — ვკითხულობ მას და ენატრობ
იმ დღეს, როცა ჩვენს ზალაში თავმოყრილ ძმებს უფროსი სახ-
ლიკაცი გვეტყვის — „ბიჭებო, აბა დალიეთ გამარჯვების...“

მაინტერესებს როგორია ბაზარი, ფასები, როგორ ხარ
თქვენ. ფულით რაც შემეძლება დაგეხმარებით, ჩემთვის იგი
საჭირო არ არის... ჯემიკოს, მახსოვს. წერილ-წერილი ფული
უყვარდა საბაზროდ. არ გამოუღიოთ. იცოდეთ! სწავლაში კი —
მხოლოდ ფრიადოსანი! ხატვას თუ არ დაივიწყებს, კარგი ბი-
ჭი იქნება. ბებოსაც ნუ გააჯავრებს ანცობით. იგი ახლა, ალ-
ბათ, ისე ჭკვიანია, ასეთებზე ლაპარაკი არც სჭირდება!

ვგზავნი სურათს, მიზაილოვსკში გადაღებულს. თუმცა
მკრთალია, მაგრამ მაინც პგავს რაღაცას. აქ ამ სურათში ჩემი
კარგი რუსი მეგობარი ვანია მელკაზნიოროვია თავისი მეუღლი-
თურთ (ეწვია სახლიდან). ჩემი ნაწილის პოლიტრუკია (პო-
ლიტხელი). ომის შემდეგ საქართველოს ეასტუმრებ მას; ერ-

თად ჩამოვალთ ჯერ სვერდლოვსკში, ვანიასას, შემდეგ ჩენ-
სას. ქართველებს აქ ვერ ვპოულობ. მხოლოდ ერთი — კუკურა
ორმოცამე შემხვდა და ერთურთი სახის გარეგნობით ვიცანით
ქართველებად. ქართულ ლაპარაკს მონატრულმა ორი საათი დავ-
ყავი მასთან.

მამიდას წერილი რად არ მოდის?! ველი წერილებს. მი-
სამართი ძველია.

გკოცნით და გკოცნით. თქვენი კოლია.

28. 3. 42 წ.

P. S. ქეთუნია! გაზეთ „კომუნისტში“ ჩემი ერთი ლექსის
გარდა არაფერი დაბეჭდილა? (იპოლიტე ქვილორიას დავუტო-
ვე ლექსები, მახსოვს).

კოლია.

გამარჯვება ბიზა!

თუმცა არა შენგან, მაგრამ მაინც გავიგე შენი ნავთსაყუდა-
რი.

მე-ნ თვეა საქართველოს ცა მენატრება უფრო იმიტომ, რომ
იქ, იმ ცას ქვეშ, ჩემი თაობის მეგობრები მეგულებიან... და თუ
ისინიც ღლეთა მოთხოვნილებამ ქვეყნის სხვადასხვა კიდეებში
დააშორიშორა, მაშინ სჯობს ნატვრა ჩქარ და სახალისო შეხ-
ვედრაზე ომიდან შინდაბრუნებული, ნაომარი ყმაწვილებისა...

მე იანვრის 9-დან მოქმედი არმიის მწყობრში ვარ. პირდა-
პირ შეტევაზე ჩემს ნაწილს ჯერ არ უხდება მოქმედება, მაგრამ
კარგად იცი—ორი კილომეტრით მოწინავე პოზიციებიდან დაშო-
რებული ნაწილის მდგომარეობა ახლანდელ ომში. მრავალჯერ
თავზე დაგვყავყავებენ თვითმფრინავები სეასტიკის ნიშნით, აკე-
თებენ ირაოს ჩვენს ზემოთ, გრუხუნებენ, სტვენენ შემაზრზენად.
ხრიალებენ, ყრიან ბომბებს, ატყაუნიებენ ტყვიამფრქვევს... ასე
გრძელდება საათობით. და თუ თვითონ პირადი იარაღით არ
ებრძვი მათ, იძულებული ხარ გახვედე ადგილზე, თუნდაც გულ-

აღმა, უცქირე მათ ფარფატს... გამოჩნდება ჩვენი თუნდაც ერთი „ისტრებკა“ (გამანადგურებელი) და ოცი ნაქები მფრინავი ადოლფ ჰიტლერისა ხერელებს ეძებს საპაერო გზებში, გარბიან უჩვეულო სისწრაფით. ადექ და გახედე მეგობრებს, მეგრძოლებს: ამოდენი ხორხოცის შემდეგ შედეგი არაფერია, არის მხოლოდ ორმოები — ბომბთაგან ჩვენს გვერდით გაკეთებული, ძირმოთხრილი ხეები... რამდენჯერ თოვლის. მიწის და ხეთა ნაფლეითებით დამფარა მათმა ბომბამ, — წუთის შემდეგ მუდუსავით გამოეძერები და ისევ ის კოლია ვარ, უენებელი და სიმღერის მოყვარული. თუ ცაში წითელვარსკლავიან თვითმფრინავს ხედავ, მოდიოდეს მასზე თუნდაც მტრის ასი სატრაპი, გრძნობ რომ ლაჟვარდში ჩვენი იმედია. ჩვენი გმირი მფრინავა, რომელიც ათასნაირი ოინბაზობით და ჰაერში ბრძოლის უჩვეულო ოსტატობით ფრიცებს ჩვენს მიწაზე ყრის ფრენის სურვილდაკარგულთ, ან აფრენის ადგილისკენ აბრუნებინებს პირს. ახლა უფრო მესმის ჩვენი იოსკას სიმამაცე, თუმცა ის, როგორც ვიცი, უფრო არა მტრის თვითმფრინავებს ებრძვის, არამედ ზურგში ურტყამს რეზერვებს, სამხედრო ობიექტებს: სადღაც ვაძინახავს ეშმაკურ გზას, დახელავს ვერავთ და ღზინობს მათ ზემოთ.

შესვენება-შუალედებისას წერილების წერის მეტს არას ვაკეობ. „ვენნი“ კალმისტარი ვიგდე ხელთ. მაგრამ ათასნაირი მელნით ვავსებ მას და ერთადერთი კალამი ლამის მთლად გაძიფუჭდეს (აქ სად იშოვი კალამს)... მაინც ასე დიდსა და ხშირ წერილებსა ვწერ.

მოიწერე დაწერილებით შენი ცხოვრების შესახებ. პატარა ბიჭი შენ კი არა, მეც მომენატრა, — ვერ პოულობ საშუალებას მისა ნახვისათვის?

ველი შენს წერილს. მოიწერე რა იცით ჩვენი ბიჭების შესახებ (მისამართებიც). ბენია ტრამვაიდან დავინახე, სამხედრო ფორმით იყო თბილისში. დამიყვინა — „კოლია, კოლია“. ვხედავ — ბენ-ნი! ტრამვაიში სამხედრო კოლონა ეისხედო, არ მოხერხდა ნახვა. არ ვიცი ისევ თბილისშია თუ სად.

შეითან. ლექსების წერაში იქ ეზარმაცობდი, აქ 9-10-მდე ლექსი გავაკეთე — სანგრებმა და ფრონტმა რაღაც განმაცდევინა

ნეს და სტრიქონებიც თავისთავად აიკინძნენ. მათ შესახებ — ჩვენი შეხვედრისას.

შენ, ალბათ, „კომუნისტს“ ისევე კითხულობ. აქეთ წამოსვლისას იპოვებდი ქვილორიას დაუტოვევ ორიოდ ლექსი. გაგზავნა თუ არა რედაქციაში. არ ვიცი. თუ დაიბეჭდა. მაცნობე შენი აზრი მათზე (ერთი იოსებ ჭაბუკიანზე იყო, მეორეც ლექსი, რომლის ქვედა სტროფი თავდებოდა სტალინზე შეძახილით ქართულად. აფხაზურად, თათრულად და ოსურად).

ვაჟა-ფშაველას, შენი თბილი ტანსაცმელი მე მივისაკუთრე, ფრონტიზე გაველამდე ერთგულად შემსახურა. შემდეგ ზედმეტი შეიქნა. მაინც ვინახავ — საქართველოდან ჩემი კეთილისმყოფელ-თაგან ამ უსაჭიროეს საჩუქარს.

კარგად იყავი! მალე ნახვამდის!

შენი კ. დ. კოპალიანი

10. 4. 42 წ.

ჩრდილო-დასავლეთის ფრონტი.

დედა, შუშანა, ქეთო!

აღვიძრული გამოვიცვალე. თქვენგან წერილების მიღება ხშირად, მგონი, ამ პირობებში გაძნელდეს. ფრონტის წინა ხაზზე ვაწვდით მებრძოლთ მტრის განადგურებისათვის საჭირო ყველაფერს — საბრძოლო მასალებსა და ჰერმეტიკს... ავიაციისა და არტილერიის მნიშვნელობა ახლანდელ ომში გასაგებია. ისინი მშვიდობიანად არც შორეულ ზურგს ტოვებენ, ხოლო ფრონტის წინა ხაზზე ხშირად ძნელია გარკვევა და გაუფრთხილებელი ნაბიჯი ცბიერი მტრის ბაღეში ამოგაყოფინებს თავს მთელი სამხედრო ავლა-დიდებით. ჰაი, ჰაი, რომ თქვენთვის ძნელი წარმოსადგენია რა ცბიერი და მამაძაღლია ჩვენზე მოსული შავი ძაღვი; ათასნაირად შემოგივლის, რომ რაიმე მოგიხერხოს, მაგრამ გრძნობ მაინც, რომ ახლანდელი გერმანელი მაინც სხვაა, მაინც სუსტია, ვიდრე გასული წლის იენისის თვეში ჩვენს საზღვრებთან საღამოშროდ ამხედრებული.

ბევრი მაქვს სალაპარაკო, წერილით ძნელია ამაზე, მომავალი შეხვედრისათვის გადავდოთ ყოველივე ეს.

მოიწერეთ ღებულობთ თუ არა ატესტატით ფულს რაისამხედრო კომისარიატიდან.

შუშანა და ქეთო! ასეთი ომი ისტორიას არ ახსივს, სამხედრო ხელოვნების ახალი მიღწევებით მძაფრდება იგი ყოველდღიურად. ხშირად მოულოდნელობით გაკვირვებენ ომის უჩვეულო საოცრებანი. ბევრი რამეა მოსალოდნელი. მოსალოდნელია ისიც, რომ ერთმანეთს წერილებითაც ვერ ვესაუბრებოდეთ. მაგრამ მე კარგად ვიქნები. ოთარასი მ თვეა არაფერი ისმის? ძნელია... მაგრამ მჯერა, რომ იგი სადღაც კარგად არის. წერილსაც მალე უნდა მოელოდეთ მისგან. წერილების მიუღებლობა არაფერია, ოღონდ არ უნდა იფიქროთ, რომ, რაკი წერილი არ არის, დაიღუპა კაცი. ასე არ არის ხშირად. თქვენ იცით და დედამ. კარგია რომ დედას ერთადერთი წერილი მაინც მაქვს ომში გასვლის დღიდან. მისთვის ძნელია შემოფანტულ შეილებზე ფიქრი. აქ თქვენი დახმარებაა საჭირო.

ჯუჯაიას უთხარი. ბებო არ გააჯავროს. თორემ ავიშლებით. ისწავლოს ისე. რომ კლასში ვერავენ სჯობდეს.

მამიდა ლიზას წერილი არ იქნა და არა... ალბათ, ლოცვებს უფრო უნდება. „უსმინე უფალო, დაღადებასა მამიდაისა ჩემისა. რამეთუ ლოცულობს იგი დამყარებასა ამა ქვეყნად მშვიდობიანობისა, წესრიგს საბრძანებელისა შენისა... ამინ“ (გული არ მოუვიდეს ასეთი ქართულისთვის. აბა, წერილი მოიწეროს!).

წერილები მალე მოიწერეთ. მოსალოდნელია მალე შემტევ ნაწილში გადავიდეთ. მაშინ ძნელია მიწერ-მოწერა ამ მხარეში.

გკოცნით. თქვენი კოლია.

25. 5. 42 წ.

დედა, ნინა, ქეთო!!!

გერმანელების მიერ როსტოვის აღების შემდეგ იგრძნობა, რომ წერილებს აგვიანდება კაუკასიის მხარიდან. გასაგებია: ახლა უფრო შორი გზა აქვს გასარები მოგზაურ ქაღალდებს. ამი-

ტომ არის, რომ ამდენი ხანია ამაოდ ველი თქვენგან ჩემთვის სანატრელ სტრიქონებს.

ოთარიზე ეს ერთი ხანია ჩემგან აუხსნელი სიზმრები დამტრიალებენ თავს ყოველ ღამით. ნეტავ იმის ნიშანი იქნებოდეს — მალე შევხვდე მას! ცოტა ხნის წინათ (მეორე თვეა მას შემდეგ) პარტიზანლობა ვითხოვე მკითხეს რაღაცები. იციან — რუსულში არც ისე ენამარჯვე ვარ და საკომანდო ნაწილში გაგზავნას მარიდებენ. კომისარმა ერთხელ, სპეციალურად დაბარებულს. ისიც მკითხა:

— ვთქვათ, ვერ გაიგონა მეგრძოლმა შენი განკარგულება, ან, უკეთ, ვერ გაიგო და ამოცანის შესრულებისას. გადამწყვეტ მომენტში, ადგილიდან არ იძვრის, ან შეტევაზე არ მოგყვება, — რას იზამდით?

— დაეხერხებოდა იქვე! — ვუპასუხე.

მან კი გაიცინა და თქვა:

— დამნაშავე მეგრძოლის ასეთ ქცევაში შენც იქნები. შენ ზომ კარგად და მკაფიოდ გასაგებად არ შეგიძლია რუსული ილაპარაკო. მერე, აღზრდაც არის საჭირო მეგრძოლებისო.

— ჩემი ამ რუსულით თუ გაიზრდება, ზომ კარგი, თუ არა და ახლა არც დროა და არც საშუალება, ამის გარდა შეტევაში რომ წინსვლა უნდა, ეს ჩემმა პატარა ძმისშვილმაც იცის-თქო... ამიტომ უკან დარჩენილი ცოცხლად ვერ დამრჩება-თქო.

ისევ სიცილი!

— აბა, პარტიზანად გამგზავნეთ ფრონტის იქეთა ხაზზე. სახლიკაციც პარტიზანია-თქო. — ვუთხარი მათ ამ სიცილის გამო თითქმის გულმოსულად.

— ვნახოთ, მოიცადე!

მალე გადმომცეს ძიმართვა. ვტოვებდი ჩემს ძველ ნაწილს. დავექშვიდობე ყველას იმ აზრით, რომ მივდივარ მტრის ზურგში, გასაელეღია ფრონტის წინა ხაზი, მტრის მოწინავე პოზიციები. ათასნაირ ეშმაკობაზე ერთბაშად მოვიფიქრე. სახლში კი, თქვენკენ, ახლა ვგრძნობ, ვერ გამოვეგზავნე კარგი წერილი თქვენი წერილები იქნებ ვერ მივიღო, საველე ფოსტასთან ახლოს არ ვიქნე მგონი-თქო. ხაზგასმული მოვიგონე, რომ არ მიმხედარიყავით ჩემს განზრახვას პარტიზანად წასვლის შესა-

ზებ. აღმოჩნდა კი ისე. რომ კომისარმა ამ ნაწილში გამოგზავნა.

მშვიდობიანობაა. შედარებით, უჩვეულო! აქაური ლეგიონის კომისარს მოვეწონე — „მზიარული კავკასიელი ბრძოლის მშვე-
ნებააო“, მგონი მალე წინა ხაზზე გავიდეთ. ახლა კი ისე
ეცხოვრობ, თითქმის სახლში ვარ. მხოლოდ მშვიდად ვერ ვი-
ძინებ ერთი საათითაც კი (არტილერიის კანონადა, საჰაერო
თავდასხმები, იშვიათად მტრის წვრილი ღესანტები...).

გერმანელთა თვითმფრინავები ახლა საშიში აღარ არიან.
ჩვენი საზენიტო იარაღით დამფრთხალნი. იმ სიმაღლიდან ყრი-
ან ყუმბარებს, რომ მიზანში ათასიდან ერთს ვერ მოახვედრებენ,
შარშან კი, ეჰ, რამდენჯერ 10-ოდე მეტრის სიმაღლეზე გადა-
მირბინა ცხენზე მჯდომს ტყვიების დაშენით. მაჰიდაჩემის ლოც-
ვაჲ კალაშარჩინა ალბათ.

იქნებ გაინტერესებთ, როდის მოვალ სახლში. მანამდე, მგონი,
მრავალმა წყალმა ჩაიაროს. გაიძვერა მტერი ბოლომდე უნდა
განადგურდეს. საკმაოდ დიდი დროა საჭირო. ვფიქრობ, ჩემს
მანდ მოსვლამდე ბიჭიკო ლარცულიანი ცოლსაც შეირთავს, ნინა
გათხოვდება, ბიჭოლიაც ნადირობაზე გულს აიყრის... ზომ ხე-
დავთ რამდენი დრო არის წინ ჩემი თქვენთან შეხვედრის
დღემდე...

თქვენ იცით და თქვენმა კარგად ყოფნამ. ახლა საქართველო-
საც საშიში დღე ელის; ჰაერიდან შეუძლიათ ბევრჯერ გესტუმ-
რონ. „ბლინდაჟის“ გაკეთებას ნუ დაიზარებთ — მკვიდრი იყოს,
მაგარი, ყუმბარა რომ მოინელოს!

მოკითხვა ყველას!

გოცნით და გოცნით თქვენი კოლია

10. 8. 42 წ.

ჩრდილო-დასავლეთი.

P. S. ნინა იწერება „საქართველოს ზომ არ დაუახლოვდით“.
საველე ფოსტის №-ით მსჯელობს. არა. ისევ ჩ/დასავლეთში
ვარ — შეურყეველ ლენინგრადთან ახლოს.

...ყველა მენატრებით, მაგრამ თუ ბავშვების ჩემგან ასე დაშორება ასეთ გრძნობებს აღმიძრავდა, არა მჯეროდა. ახლა ვგრძნობ, — ისინი მაშინაც კარგები იყვნენ, როცა თავიანთი საზღვარგადასულ აბეზრობით დედას, ბებოს და ზოგჯერ მეც მაგულისებდნენ.

გზად ვარ-თქო გწერთ. ძველ ადგილებში მტერს ფეხი ავაკეთინეთ. ბოლოუამს საოცრება იყო: დღით ურტყამდა ჩვენს პოზიციებს ყველა იარაღით... ღამით სრული სიმშვიდე იყო. მეორე დღით კი მტრის არტილერია მისსავე პოზიციებს ღრღნიდა. გაკვირება — რატომ უშენენ ცეცხლს თავიანთ პოზიციებს? დაზვერვამ გამოარკვია, რომ ალყით შეშინებულმა ფრიცებმა ღამით დატოვეს ჩვენი ტერიტორია და გარბიან... მეორე ნაწილმა მტერს გადაუჭრა გზები და ქ. დემიანსკის მტრულ დაჯგუფებას ჩვენც სულთანა ვუმღერეთ. ტყვე გერმანელების საცოდავმა სახეებმა ერთხელ კიდევ დაადასტურეს, რომ იბრძვიან უბედურების შიშით — ჰიტლერისგან რომ მოეღიოთ უკანდახვეის შემთხვევაში. თორემ გაბედულ მეომრებად ისტორიას უნებურად დაწინაურებული ეფრეიტორის ზალხი ბუნებას არ დაუბადია. რუსული „ურას“ შეძახილს უცებ პასუხობენ იარაღის დაყრდნით და ყვირალით „ჰიტლერ კაპუტ“.

მივდივართ იქეთ. სადაც მტერმა თავი მოუყარა თავის შიფერთხილ ძალებს და სურს გამაგრდეს. წინ უფრო დიდი ოპერაციები გველის. მე კარგად ვარ, მით უფრო, რომ ორი ზამთრის სუსხი ავითვისე. მტრის ავიაცია არ ჩანს. მისი არტილერია კი ჩვენს არტილერიასთან ვეროდეს დადგება. ასე რომ — მივდივართ მშვიდად და ხშირად გამჟღავნი შეძახილებით (ჩვენმა ავიაციამ დიდი ხანია დასჯაბნა გერინგის სეაეები).

დიდმს ისევ არ იწვევენ? კარგია. ეჰ, რა ცუბილია მოგონება თქვენსას გატარებული სტუდენტური დღეებისა! ნინა მწერს. ხშირად ვსვამთ შენს სადღეგრძელოსო. ალბათ გისმენთ „ღმერთი“, რომ ასე კარგად ვარ. ჩემს გაზრდაში დიდიმის დაუფასებელი გულთბილობა ასე არ მსურდა გადამეხადა, მაგრამ ჰიტლერმა აამღვრია წყალი. მისი კარგი ხასიათი უფრო სხვამ იცის ზოგჯერ, ვიდრე ცხოვრების თანაზიარმა მეუღლემ. მგონი დამრ-

ჩეს სიცოცხლის დღეები, ისევ ერთად ვიქნე თქვენთან და პატარა ანჰორიკოს მაინც ვაგრძნობინებ ბიძობას...

მისამართი ისევ ძველი რჩება. მწერეთ ხშირად. მაყითხვა თქვენებს.

გკოცნით და გკოცნით კოლია

7. 3. 43 წ

მ ე თ ი

შენი ცხოვრების ახალმა პირობებმა დედა არ დაგვიწყოს თორემ... ყველას გაუასებთ. მაგრამ დედასავით, თქვენც იცით. არავის!.. ხომ ხედავ, მისი მოხუცებულობის დღეთა დასაწყისებს, რომ ელოდა. აღდენ შვილმოსწრებულ მშობელს როგორ გაუმართლდა შოლოდინი! კარგია თუ მის ქალიშვილთ და უფროს ვაჟს მანდ ხედავს ხოლმე ხანდახან. შენც იცოდე და ჩვენმა გველა კეთილმა, რომ ვისაც ოთარისა და კოლიას მანდ დაბრუნებაზე ერთხელ მაინც თბილი სიტყვა დასცდენია — დედას რომ რაიმე გაუჭირდეს, — ნურც ელოდეთ სიცოცხლეშემორჩენილი ძნების ხილვას საქართველოში. ეს ისე... გული მტკივა ამას რომ ეწერ.. მაგრამ თქვენ უნდა გაიგოთ ყველაფერი. მე კი მხოლოდ მასზე დარღები არ მასვენებენ... სიბერეს ხომ თავისებური თვალყურა უნდა. ებრასის ამბის შემდეგ კი (რომლის არსებაც ასე მაკრად გამოიყურებოდა) ყველაფერი ეგზომ მაწვალებს და მაფიქრებს მარტო დატოვებული დედა კი ვიცი ხმამაღლადაც ქეითინებს (ჩემი წამოსვლისას ჩემთან მაკრად იყო. მაგრამ სამხარეულოში შევესწარი, რომ მარტოდ მყოფი ტირიდა). სატირალი მალე მტერს ექნება და ჩვენც ყველანი სახლში ბედნიერად მოვაღოთ თუ ეს არ სჯერავს დედას, ძნელია მისი სიმშვიდე. სატირა კი, რომ მან შვილებზე არაფერი იდარღოს. რომ ვიცოდე, რომ იგი საერთოდ არაფერზე წუხს და თავს უვლის თუნდაც იმისათვის რომ ფრონტიდან მოსულ შვილთ ძველებური მხნეობით ვადაცხვიოს. ქვეყნად არაფერზე ვადარებდი და გულიც ძალას შეგმატებდა სახელიანი სიცოცხლისათვის ბრძოლად გასულ ჭაბუკს.

ვამთავრებ ამაზე წერას... ძნელიცაა წერა!

მოკითხვა მეზობელთ, ამხანაგებს.

ქეთო! დათიკო ყურაშვილი მწერს ამხანაგებზე, მაგრამ არც ერთის მისამართს კი არ ზატყობინებს. მწერს, რომ ისინი ცოცხალნი არიან სადღაც. მომწერე გიგაზე, კუკუნაზე, ბენიაზე. შალიკო დავითულაიანზე და ფრონტზე გასულ სხვათა შესახებ.

ნახვამდის ჩემო კარგებო.

გოცნით და გოცნით თქვენი კოლია.

24. 1. 44 წ.

დუდაჩიეო!

28 მარტს დავტოვე მხარე რუზერვისა, სასეირნო ველ-მიდამონი... 29 მარტს ჩამაბარეს ნაწილი და 31-ს მივიღე პირველი ბრძოლა მტერთან ამ ტერიტორიაზე. ასეთი რამ ჯერ არ განმეცადა. გერმანელებმა ტანკებითა და თვითმფრინავებით სცადეს დაბრუნება გუშინწინდელი დანაკარგი ტერიტორიისა. პირდაპირ ჩემი ნაწილისკენ 18 ტანკი წამოვიდა კოლონად მოწყობილი. მოდიოდნენ თითქოს თავისუფლად და საზეიმო იერით. მე ჩემი მეზობლები გავაფრთხილე — უკიდურეს შემთხვევაში გაუშვან ზურგში ტანკები, ფეხოსანთ კი მოჰკვეთონ ფეხი... ტანკებს ბრძოლის ველზე ჩვენს ქვეყანაში შესაფერი მასპინძელი ზღდება — განთქმული რუსული არტილერია; მტრის თვითმფრინავებს მეზენიტები უმზადებენ პურ-მარილს. ასე, რომ — დაგვრჩენია ფეხოსანთ ვუძღვნათ შესაფერი ულუფა. ვერაფერმა გასტეხა ჩვენი წინააღმდეგობა და დილის 5 საათიდან დაწყებული ბრძოლა ჩაშუადღევის 4 საათზე დასრულდა ჩვენი გამარჯვებით. მტერმა ჩემი სანგრების წინ დატოვა სამი გადამწვარი ტანკი (4-ოდე ტანკისტი ტყვედ ჩავიგდეთ). შვიდი კი უკანვე გაზიდ-ბუქსირით მამაძაღლმა (დაზიანებულნი და ბრძოლისთვის უვარგისნი). ჩემს იმ ძველ ნაწილში — ასე დიდხანს წინათ რომ ვმსახურობდი, არ მქონია შემთხვევა შევხვედროდი მოწინააღმდეგის ტანკთ (ჭაობიანი ტერიტორია უშლიდა ხელს), აქ კი — ისინი მოდიოდნენ ბატებივით ჩამწყრივებული, ხშირად ცაგერის ქუჩებში რომ მინახავს.

მხნედ ვარ, თუმცა საოცრად შეიცვალნენ ცხოვრების პირობები. მე ზომ უკანასკნელი 6 თვის მანძილზე ისევ მიეჩევიე მოქალაქეობრივ ცხოვრებას: კლუბს, თეატრს, გოგონებს, არაყს და სეირნობას. ახლა კი — ნესტიანი სანგრები; თოვლი ჯერაც ადრე დადგა, 3 აპრილს, ისეთი სიცივეა, ზამთრის დღეებმაც არ იცის ასე ჩვენი. შუადღისას მზის სითბო მიწას ალბობს და გვინგრევს ყინვაში ნაგებ ბინებს. რას იზამ... ომია და ყველაფერი უნდა აიტანო.

ჩვენგან დატყვევებული გერმანელები მშიშრულად გაჰკიოდნენ: „პიტლერ კაპუტ“, „მაინ ფატერ — რუს!“ და სხვა ამგვარი. ხელებსა კი ცას აბჯენდნენ — ეშინოდათ არ მოეკლათ.

ეცხოვრობ მხედრულად. ბინა ყუმბარებისგან დამიცავს, ზოლო ტყვიისა არც ისე მეშინია, მეც ბლომად მაქვს ისინი.

აქ მოსვლისთანავე წინა ხაზზე გავედი. იანვრის თვიდან ხელფასი არ მიმიღია (რეზერვში ყოფნისას). ფინ. განყოფილების უფროსთან შეხვედრის შემთხვევა არ მქონდა; მალე ატესტატის საქმეს გაეაქეთებ. მაისიდან კი ახალი იქნება. მოიწერეთ მოსკოვიდან ფინსახკომმა გაცნობათ თუ არა რაიმე ჩემი განცხადების საფუძველზე.

ასე დედაჩემო! იყავი კარგად. ყოჩაღად დამხვდი, თორემ ჩვენი შეხვედრა ცუდი იქნება. შვილებზე დარდებით თუ თავს დაისუსტებ, ამით შვილებს ვერაფერს შესძენ, ცუდის გარდა. იყავი მხნედ და კარგად. ქეთუნია როგორ არის მისი ქმრით. მოიწერონ წერილი ყველამ. მოკითხვა ყველა ამხანაგთ, ნაცნობთ! მაცნობეთ ამხანაგების მისამართი. აბა თქვენ იცით.

გოცნით და გოცნით თქვენი კო ლ ი ა.

3. 4. 44 წ.

ჩემო სანატრელებო!

...ახლოვდება მძიმე დღეების ბოლო და რარიგ სანატრელი ხართ ჩემი კარგი თბილისითურთ!

მარო სვანეთშია? მისგან წერილი დიდი ხანია არ მახსოვს.

დამიკოცნეთ ანზორი და ნელი. მიუსალმეთ თქვენს კეთილთ, მეგობართ! იყავით მხნედ და კარგად!

გოცნით და გოცნით თქვენი კოლია. |

6. 4. 44 წ.

ეს უკანასკნელი წერილი გამოგზავნილია დაღუპვის წინააღმდეგ მისამართით: თბილისი, საქართველოს სსრ, ხვამლის № 14. დიდმა ივანეს ძე მარგიანს.

ს ა რ ჩ ე ვ ი

ნიკოლოზ კობალაიანი წინასიტყვა გიგა ყურაშვილისა	3
მურის ციხე	9
...და დარჩა ხსოვნა	10
* * * იქნებ ვცდები...	11
მძივები ერთი ლექსიდან	12
ნეტავ	12
მზად ვართ მუდამ...	13
საახალწლო წერილი დედას	15
წიწამურთან	15
გახსოვს ის ღამე?	16
ღილა ბანაკად	17
ასრულებულა მისი წადილი	18
შებინდებისას მგოსნის საფლავთან	19
ამბავი ერთი სადღეგრძელოსი	19
ღელა ფრონტზეა, პატარავ!	20
ჩემს კომკავშირულ ბილეთს	21
ბელადის სურათთან	22
აკროსტიხი	23
ცხოვრება, თურმე, არ გინახია	24
მაინც ერთად ვართ...	25
გალაკტიონ ტაბიძეს	26
და ბოლოს შენთან	27
ოთარის	28
მე თვითონ მივალ!	29
დღიურებიდან	30
როგორ გიხმობდი, როგორ გნატრობდი	32
ჩემო რძეტიბილო დედილო	32
ორი ლექსი დღიურიდან	35
დედი, იქნებ შენ გამაგებინო	37
სად ვარ?	38
ჩემო მახარავე	40
ეპიტაფია	41
ფრონტული წერილები	43